

Marki-á nìv̀nì tir nê wãrki Yesu tyí soko

N yúpyé, yépi nónó-á sébẽ mènɛ n kar,

«Nê me Yesule?» Píkinyahno yó ye, no pól yĩne pè pé gblõy piki yah kéle. Wâh sõ me Yesu pĩ di mónóle, képah náh pi, á náh n̄ tyí noh yah pólle: No pól ki fẽ gbah tẽ à pĩ palle.- Sébẽ nê-á á tẽ yĩn á gbò, képah ki píkinyahno m̄ yah yo n̄ syah, ki Yesu dùkùle n̄ wẽki. Dí yó ye wãrki kéle di mónóle. Kéne dí yĩn ye sò Markule. Kè Yesu min pi dùkù tyíle n yo, ànê n̄ tyípin̄ne, ànê n̄ welole. Sépi n tyah n̄ tyípin̄n̄ tyí, à pò no n̄ kúnó ànê ní yúkúnó tyí. Képah n wẽki ne, Yesu-á pò Liyel tǒrile, té wãh fẽ syi n̄ gblõy tíkinmon̄o yõ, névyè pwáhn̄o yĩnne.

Kéne sébẽne, Bibili tyah yó ye nê-á Liyel wey sébẽ n̄gbẽne. Képah fĩ yó ye.

Yé ki fẽ kyi welo yísyó we, sé pínó ki me tah. Té pókónmon̄o me dùkù-à me, ké tyàh-nsah, kè ále n wẽki ne, wáh ki fẽ wey m̄ yah yónó we sébẽ m̄ tyé-nsah soko.

Nte, wâh tẽ yĩn nê kar kwlo, á ki yah te sébẽ tyé-nsah soko. Ké kèpikì wey wãrki dùkù tò me n̄n̄pó, ànê ké wĩn weyne.

Yé pól pĩ ne nkẽ, nê-á tükù n ye «Lékám Pèpeyne», tükù òne n ye «Liyel Mirkile». Té, Liyel wey v̄nmon̄o soko, yĩn núkú ó ye ki fẽ yah toko képah yĩnne. Nte, áyáh «Liyel Mirkí» yah

toko, kè nàh pɪ nɛ, kɛpah sɔ́ á toko kúmm yõ dé!
 Á me ké tyí nɛ, yépi tɔ lékámne á kɔ́ ké tyí yõ.
 Ké ye dùkù yó lékám se me yé tyí, yé kɪ fě á kɔ́?
 A wil yīn mɛ̀ tyí sɔkɔ, wáh tir yó we sébɛ̀ mɛ̀
 sɔkɔ, té ké yo dùkù nàh ple wīn wey sɔkɔ áwɔ
 yah, gbah n tɛ̀ kè yo á syah.

Liyel pèpɔɾɪ pɪ á tyí ké kàrnó sɔkɔ.

Wèlnwìlkì-ò Nsyõ wey yónsàhnóle

¹ Liyel pi Yesu *Krista nìvìnì wey sán
 tyàh-ñsah ye yò.

² Sɔ́-á kéle wárkínsàhnóle *Liyel tɛ̀ntò
 syínyo-ò *Yesayi sébɛ̀ sɔkɔ nɛ:

«Yah, nɔ́mɔ Liyel kɪ n tɛ̀ntò névi tɛkɪ mɔ́ á yahle,
 à kɪ pɔ́ á wɛ̀kì tɔ́ sah á tyí.»

³ Nnì yó yīnpɔ́ ye n dɔkɔ gbɛ̀nnɪ sɔkɔ nɛ n̄kɛ:

«Yé Tɛ̀-ngbɛ̀ wɛ̀kì tɔ́ sah,
 yé kè pɪ tómm!»*

⁴ Káh wárkɪ sah sɔ́, sɛ̀ ye *Wèlnwìlkì-ò Nsyõ
 pɔ́ wil mɔ́ gbɛ̀nnɪ sɔkɔ. Á tyah n yo n kɔ́ névyɛ
 tyí nɛ, pè pé nno vi mɔ́, pè mó *wèlnwìlkínó we.
 Kɛpah sɔkɔ, Liyel-á kɪ pé tyípɛ̀l yõ mɔ́ pè kɔ́.

⁵ Kɛpah tɛ̀nɛ, Yude kwlo névyɛ pól, ànê tɔ́
 Yerusalemɪ névyɛ pól sò me n pɔ́ n pɔ́ n tyí, n
 pɔ́ pé tyípɛ̀l yo névyɛ pól yí yah, té ǎ pè wel n
 wilki Yurdɛ̀ yo sɔkɔ.

⁶ Té, Nsyõ sò me yàhmíkì yè fwòmɔn mɔ́, té n̄
 syĩ tɛ̀ sêl kɔ́le. N̄ yòkele sò sègblo ànê syĩɾɪ ye.

* **1:3** 1.3 - Yah n tɛ Yesayi 40.3 sɔkɔ.

⁷ A sò me n yo tówû tyí: «Névi nê-á kú n pɔ n pi n̄mɔ náh, n̄mɔ ye gblò kal n̄mɔɛ. N̄mɔ tẽ náh yĩne mé kɔ yĩn, ñ gbáhkì lékyêh sro de.

⁸ N̄mɔ ye yéɛ n wel n wilki ni sɔkɔ, ñte n̄mɔ kú pɔ yé wel n wilki n pi *Liyel Mírki sɔkɔ.»

Yesu wèlnwìlkìnó ànê ò tǎnmɔnɔɛ

⁹ Légbíne, Yesu wil Nasaretu kwil, Kalile sétáh yõ, à pɔ Nsyõ kõ à à *wel wilki Yurdẽ yɔ sɔkɔ.

¹⁰ Té, wáh n wil ni sɔkɔ gbí nêne, à yĩnyõ we kè n yíkú n mɔ, té *Liyel Mírki tiki ñ yõ, dàhyòkèpil sõ.

¹¹ Légbíne, yĩnpõ yó n wil Liyel sɔkɔ ne ñkẽ: «Áwɔ ye n̄mɔ n̄dè Pi núkúnine. Á tyí nɔ yíí n tyí kègbile.»

¹² Ké nénpó swɔ, Liyel Mírki à tẽ yuku gbènnu sɔkɔ.

¹³ A sèp̄in tìkíniní pɔ nénpó sɔkɔ. Té *sétàn yòtẽ pɔ ñne n tǎ n mɔ. A sò me gbènkɔ n̄yó sɔkɔ, té *yĩnyõ tẽntòbe me ñ tẽ-ñsahle n yah.

Yesu yènkɔ tǎpú népî òyêh ye

¹⁴ Képah náh, pè pɔ *Wèlnwìlkì-ò Nsyõ dah mɔ wòkònpèkè sɔkɔ.† N déntenɔ náh wòkònpèkè, Yesu yuku Kalile sɔkɔ, à kyɛ tyah n̄vìnì wey sánne n yo n kõ, nê-á wil Liyel tyí.

¹⁵ A ne: «Gbí nê tyí-á sò yo sah, kè me de te. *Liyel tǎrí me yĩni tẽ te. Yé yé nno vi mɔ, yé mó sã n̄vìnì wey sán yõ!»

† **1:14** 1.14 - Képah yah kú n yo n pi Marki 6.17 ànê 18 sɔkɔ.

16 Wǎh sò me n kɔ Kalile yó-̀ngbě gbòpɔ gbí nêne, à yěnkɔ tǣpú nɛpî nímí we, Simo, ànê ñ gběndí Andrele. Pè sò me yěnkɔ tǣ tǣ mnɔle n min yěnkɔle n tǣ yɔ sɔkɔ.

17 A yɔ pé tyí ne: «Yé pɔ ñmɔ náh. Mé kɪ yé pɪ névyé tǣpúle Liyel tyí.»

18 Nénpó swɔ, pé núkú pé yěnkɔ tǣ tǣ mno sah, té ñ sò tǣ.

19 Wǎh tǔ kɔ yuku yahle kwéy, à kyɪ Sebede wěnpî we, Nsyakɪ ànê Nsyɔne. Pè sò me pé krótókè sɔkɔ, me yěnkɔ tǣ tǣ mnɔle n tǔ n sah.

20 Ké nénpó swɔ, à pépi tɔ ye yah. Pè núkú yal pé sú ànê ñ tɔnpɪbɪ tnô krótókè sɔkɔ, té ñ sò tǣ.

Yesu tǣnwɛnɔle sétǎn yǔ

21 Képah náh, wǎh nónó ye, à yuku péle Kapernayim kwil sɔkɔ. *Mɪ mɪ yòh sóle, à kyɪ de *Liyel ní-ńsah wòkò, à tyah névyele n kwɔ.

22 Nónó-á sò me ñ weyne n nohnɪ, pé gbǎn du ñ névyé kwónó dùkùle. Tir yó náh, kè náh sò me núkùle ànê *Liyel ñgbò wěkì kwópú tyíle. Ñmɔ kwɔ dùkù sò me yǔtǔrí kwónóle, képah ye.

23 Ké légbíne, kè pɔ yíne, dí yó sò me Liyel ní-ńsah wòkò, *sétòle ñ sɔkɔ. A me yuku gbo mɔ ne,

24 kwâh nê se à n yah n kǔ pépi tyí nɪ, Nasareti Yesu? A se pɔ pépi yíkí-ńsah nɪ? Páh pǐ ne, pɪ kě-á ñne, ñmɔ nê-á wil Liyel tyí.

25 Képah tǣne, Yesu dírí kǔ sétò mè yǔ, té yo ñ tyí: «Á vyǎh vike, ñ té n wil dí mè sɔkɔ!»

²⁶ Képah sɔkɔ, sétõ dí mè yike kègbɛ, té de syi náhnáh, té wil n sɔkɔ.

²⁷ Képah névye gbǎn du. Pè tyah wěne n piki n yah ne, kwâh nê se sě ni? Kwónó késán yóle à n pi yõtõrí sɔkɔ. A fě n weki sétǎn to yõ, té sè n sah n tyí yõ.

²⁸ Kéne ní yõ, Yesu yĩn gbílkinó tõ mɔ Kalile kwlo pól sɔkɔ.

Yesu yámpú náhnáh de mɔ

²⁹ Pǎh yal *Liyel ní-ńsah wòkò, pè núkú yõ sɔkɔ de Simo ànê Andrepí gbô. Nsyaki ànê Nsyõ to sò me péle.

³⁰ Té Simo déysê sò me sěńóle wílvýáhnìne. Nénpó swɔ, pè me kè yo Yesu syah.

³¹ Wǎh kè noh sě, à nɔ de pi mè tnô, té n gbõ tẽ à yilki sah. N wílvýáhnì núkú tyε, à me yuku tyah pínne n pi pé tyí.

³² Gbíyí-á de, névye pé yámpúnɔ pól twah pɔ Yesu tyí, ànê *sétǎn-á me dénóle nónó sɔkɔ.

³³ Kwil névye pól pɔ tuke mɔ kéne gbô yah sɔkɔ.

³⁴ À me yámpú duke duke náhnáh de mɔ, té sétǎn náhnáh yĩni wilki, sǎh me de nónó sɔkɔ. Sè sò ñne n pne, ne òkù nê-á ñne. Képah ye, à yahle ne, sè káh ne n weki.

Yesu Kalile kwlo pól kɔ kɔ

³⁵ Séngbõ púsó, tyah syĩ syĩ sɔkɔ, Yesu yuku wil wòkò. A yuku gběnni sɔkɔ, à kyɪ tyah Liyelle n ni.

36 Képah sɔkɔ, Simopi yuku tyah ñne n yah n kɔ̃.

37 Pãh kyɪ à wɛ, pè à syah nɛ, névyɛ pól-á mɛ ñne n yah n kɔ̃.

38 A mɛ yo pé tyí: «Á ye yuku gbòplo kwlo sɔkɔ. Mé yĩne mé ñìvìnì wɛy sán yo nɛnpó tɔ sɔkɔ. N pónó yô ye képahɛ.»

39 Képah sɔkɔ, à kyɪ Kalile tãntãn pól sɔkɔ, mɛ Liyel wɛyne n yo n kɔ̃ pé *Liyel ní-ńtãn vî sɔkɔ, té mɛ *sétãnne n yĩni n wilki névyɛ sɔkɔ.

Yesu tótê yó de mɔ

40 Só yóle, *tótê yó nɔ de Yesu tnô, à gbètukunɔ di ñ yah, té à ni nɛ, wãh mɛ ké tyí, wãh kɪ fẽ pé de mɔ.

41 Wãh yo sɛ, ñ yãm Yesu tẽ. A mɛ ñ gbò tɔ ñ yô, à tũ ñ tyí, té nɛ: «Mé mɛ ké tyí, á kɪ de!»

42 Nɛnpó swɔ, *dú núkú à fin mɔ, à mɛ de.

43 Képah sɔkɔ, Yesu núkú à tekɪ mɔ, té kè gbah yo ñ tyí nɛ,

44 à noh yò, à káh kè yãh nɛ tyí dé! A kyɪ ñ gblöyne *sárká wĩkĩpu yòtẽ wẽkɪ. Nkẽ, *Moyisi-á sò *sárká nê tyí yo, tótãm dénmonɔ tyí sɔkɔ, à mó képah wilki, nê-á kɪ no pól wẽkɪ n pi nɛ, wãh de.

45 Ntɛ, dí-á yal ñ tnô, tir nê-á pɪ ñ tyí, à kyɪ tyah kéle n yãh n kɔ̃ no pól tyí. Kãh pɪ sɛ, Yesu náh tɔ sò fẽ ñ gblöy wẽkɪ n pi kwil yó ńtẽ sɔkɔ. A sò mɛ gbɛ mɔ tẽ kwlɔɛ, kégbó sɔkɔ, té névyɛ n wil tãntãn pól sɔkɔ, à n pɔ n pɔ ñ tyí.

2

Yesu sèkùkù dí yó de mo

¹ Sèpīn yísyó sókónteno náh, Yesu n̄ syi pɔ Kapernayim sɔkɔ. Névyé-á kè noh ne, wǎh me gbô,

² tówû yó tuke pɔ tyah fyǎh. Tě-nsah ntě náh sò me kélé yah tɔ sɔkɔ. Képah sɔkɔ, à tyah n̄ weyne péle n kwɔ.

³ Légbíne, nósýó pɔ n̄ tyí sèkùkù yóle. Népi ñyêh sò me à twah.

⁴ Té névyé tnónkàhnó tẽ tyí, pè náh sò fẽ nɔ n de n pi n̄ tnô. Pè dokɔ gběntin̄ yô, kye n̄ mé-nsah tírrle, té sèkùkù m̄ tiki mo kéné pwǎhle n̄ s̄ s̄ kwâh yô n̄ yah sɔkɔ.

⁵ Wǎh kè we, pè s̄ n̄ yô s̄, à yo sèkùkù m̄ tyí ne: «Ñ pídí, á tyípêl ye yô mo n̄ kô.»

⁶ Képah tẽne, *Liyel ñgbò wěkì kwópú nónó-á sò me tẽnóle n̄npó sɔkɔ, pè tyah n̄ sò ne,

⁷ s̄ se pi, té dí m̄ n̄ weki s̄ ni? Liyel yin-á à n̄ yiki. Ké névi se me ki fẽ tyípêl yô mo névi kô, né Liyel náh ni?

⁸ Képah sɔkɔ, wǎh núkú pé fɔkɔ s̄nɔ we s̄, à yo pé tyí ne: «S̄ pi, té yé fɔkɔ s̄nɔle s̄?»

⁹ Nê tẽ dòdò kal, à yo sèkùkù m̄ tyí ne, n̄ tyípêl-á yô mo à kô, képah náh pi, à yuku, n̄ s̄ s̄ kwâh tɔkɔ ne n̄ kɔ?

¹⁰ Nte, yé p̄ ne, tẽnwenɔ-á me *Névi Pi tyí, ki fẽ tyípêl yô mo névyé kô, té à sah sétáh yô.»

11 Képah ye, à yo sèkùkù m̀è tyí: «Mé kéle n yo á tyí, yuku, á s̃ s̃ kwâh tɔkɔ, n̄ n̄ n̄ yuku á gbô.»

12 Nénpó swɔ, dí núkú yuku n̄ s̃ s̃ kwâh tɔkɔ sɔkɔ no pól yí yah. Kè pé pól gb̃n̄ du. Pè tyah Liyel yinne n gbilki, té me n yo n̄, pé n̄h s̃nkɔ̃ wɛ yah.

Yesu Levi ye

13 Képah n̄h, Yesu t̃ɔ n syi yuku Kalile yó-̀ngb̃ gb̀pɔ. Tówú pól s̃ me n pɔ n pɔ n̄ tyí, à péle n kwɔ.

14 W̃h pɔ n sɔkɔ, à Alfe pídí Levi wɛ t̃nɔle mórí syí-̀nsah wòkò. A me yo n̄ tyí n̄, à yuku pé s̃ t̃. Levi mó yuku n̄ s̃ t̃.

15 P̃h kyi tyah yòkele n yò Levi t̃n̄ne gbí n̄n̄e, mórí syípú, àn̄ Liyel w̃kì kó-̀nk̃pú náhn̄h s̃ me n yò n̄n̄e, àn̄ n̄ *t̃ s̃hpúle. Kéne névyè dukù náhn̄h ye s̃ me n̄ s̃ t̃, képah ye.

16 Képah sɔkɔ, *Liyel n̄gbò w̃kì kwópú nónó-á s̃ *Farisiỹn̄le, pépi-á à wɛ à me n yò àn̄ kéne névyè dukùle, pé yo n̄ t̃ s̃hpú tyí n̄, kú se pi, té à n yò mórí syípú, àn̄ Liyel w̃kì kó-̀nk̃púle fí núkú n̄?

17 Yesu-á kéne wɛy noh s̃, à yo pé tyí: «Névyè nónó-á me l̄n̄le, s̃n̄pi yétò se me pé tyí? Yámpú tyí n̄h s̃n̄pi yétòle di? Névyè nónó-á n s̃ n̄, névyè t̃r t̃r-á péle, mé n̄h pɔ pépi ye yinne. N̄tɛ, nónó-á p̃ n̄, tyíp̄l pípú-á péle, pépi yé-̀nsah ye mé pɔ.»

Yesu-á nê yo níkì tǎnó tyí sòkò

18 Só yóle, *Wèlnwìlkì-ò Nsyõ tò sáhpú ànê *Farisiyǎnò sò me níkì tǎ. Névyè me kyí Yesu piki yah nɛ, kú se pi, té Nsyõ tò sáhpú ànê Farisiyǎnò tò sáhpú me níkì tǎ, té òmò *tò sáhpú náh me sǎntǎnɛ n pi ni?

19 Wǎh képah noh sǎ, à yo pé tyí: «Yépi tǎ sǎnò sòkò, fúr pí-ò-á nónó ye, pé se kɪ fǎ fúr yòke yahle, té kɪ fúr pí-ò sah pé niyó? Pɛ tǎ-à fyò me pé niyó, pé náh fǎ yòke yahle n pi.

20 Nte, gbí me n pi, pé kɪ pɔ pɛ mè wilki pé niyó. Ké lésòle, pé kɪ pyě níkì tǎ.

21 Névi yó ntǎ náh fǎ fwɔ sǎn tɔkò, à kɪ fwɔ dyàh min n pi. Wǎh képah pi, fwɔ sǎn kɪ fwɔ dyàh kú-ńsah téy yɔɾɪ yɪkɪ ntǔ, ké pwǎh kɪ gbɛ mɔ.

22 Anê tǔ, névi náh fǎ ðivǎ sǎn mɔ n pi pley di sòkò. ðivǎ sǎn-à fǔ, kè kɪ pley nópi sɛkɪ. ðivǎ kɪ kwɛ, pley tɔ kɪ yɪkɪ. Képah ye, ðivǎ sǎn ye yǎne mónóle pley snó sòkò.»*

Yesu-á nê yo mɪ mɪ yòh tyí sòkò

23 *Mɪ mɪ yòh só yóle, Yesu ànê ò *tò sáhpú sò me n kò n kah sèmukò swǎy yísyó sòkò. Képah sòkò, ò tò sáhpú tyah sèmukò ywǔle n kǔlɪ n yuku wǎkì yah.

* 2:22 2.22 - Pè sò ni ànê wɔ wɔ yíle n mɔ pilki sòkò ògbòle.

24 *Farisiyẽṅɔ-á kẹpah wε sɛ̃, pè tyah Yesule n piki n yah nε, à yah, kú se pi, té tir nê náh yĩne pínóle mi mi yòh sóle, ò tò sáhpú kéle n pi ni?

25 A me yo pé tyí: «Kwεki-á lésò *Davidi ànê ò náh névye kah tẽ só nêne, té yòke wé-ńsah náh me pé tyí, pãh nê pi, yé náh kè kar yah di?

26 A náh sò de Liyel wòkò sòkò di? Búrn nónó-á sò sàhnóle Liyel tyí yò, à náh sè tòkò tah, té ò náhtãn tò kò pè tah di? Ké légbĩne, Abyatar ye sò *sárká wĩkĩpu yòtẽ ògbẽne. Té névi yó òtẽ náh sò yĩne búrn nópi táhnóle, né sárká wĩkĩpu yòtãm náh.»†

27 Kẹpah náh, Yesu t̃o yo pé tyí: «Mi mi yòh ye sah névi yĩnne, òte névi náh mɔ mi mi yòh yĩnne.

28 Kẹpah ye, *Névi Pi pi mi mi yòh òtẽ yòtẽne.»

3

Yesu dí yó de mɔ mi mi yòh sóle

1 Kẹpah náh, Yesu ò syi de *Liyel ní-ńsah wòkò yó sòkò. Ké nénpó sòkò, dí yó sò me gbòle kúnóle.

2 *Farisiyẽṅɔ mó tyah Yesule n yah, wàh ki òtyĩnɔ à de mɔ n pi *mi mi yòh sóle, pè mó lékàh wε à kò.

3 Kẹpah sòkò, Yesu me yo gbònkù dí mè tyí nε, à yuku n pɔ yĩn névye niyó.

† 2:26 2.26 - Yah n tε 1 Samuwel 21.2-7 sòkò.

⁴ Té no piki yah: «Tir nê wě̀kì με κῶνόλε μι μι yòh sò̀le: Pè̀pɔ̀ri se yĩne pínóle, tĩ̀ pè̀kè se? A névi wilki kũ sɔ̀kɔ̀, tĩ̀ à tẽ ko mɔ?» Nte, pè náh tir yó yo.

⁵ Képah sɔ̀kɔ̀, wăh pè yah yah yé́syêhle fò̀kònyàhnì sɔ̀kɔ̀, ò yah kwɔ̀ pé kùkùtằhkì tẽ tyí. A με yo dí mè tyí: «Á gbò tǒ!» A με ò gbò tǒ, kè núkú pi ké vile.

⁶ Farisiyè̀nɔ̀-á képah we sě, pè yuku wil kéne Liyel ní-ńsah wò̀kò sɔ̀kɔ̀, à núkú kyi wě tuke mɔ ànê yòtẽ dí *Yerɔ̀di náh névyele Yesu tyí sɔ̀kɔ̀, păh ki pi sǒ, té à we n ko n mɔ n pi.

Tówû ògbě̀ yó pɔ̀ Yesu tyí

⁷ Képah náh, Yesu ànê ò *tò sáhpú yuku Kalile yó-ògbě̀ gbò̀pɔ̀, té tówû ògbě̀ yó sò̀ με ò sò̀ tẽ. Pé tókù n wil Kalile, tókù mó n wil Yude,

⁸ ànê Yerusalemi. Tókù n wil Yidume, tókù n wil Yurdě̀ yónkahnine. Tókù mó n wil Tiri ànê Sidò gbò̀plo kwlo sɔ̀kɔ̀. Kéne tówû ògbě̀ ye kyi wil ò tyí. Pè sò̀ ò tyípínó noh, képah yĩn ye.

⁹ Kăh pi sě, Yesu yo ò tò sáhpú tyí ne, pè krótókè yó tǒ sah pé kǒ, tówû káh pɔ̀ pé fyăh.

¹⁰ Wăh sò̀ με névyé náhnáhle n de n mɔ, yámpú pól sò̀ με n to n tuke ò yò ne, pé we tũ ò tyí.

¹¹ Té *sétàn-á sò̀ με nóno sɔ̀kɔ̀, păh à we, pè pé gbètukunòle n di n pɔ̀ ò yah, té n yo ò tyí dénsyino sɔ̀kɔ̀ ne, Liyel pi-á òne.

12 Képah sɔkɔ, à dírí kɔ pé yɔ, té ne, pé káh pé dùkùle n yo.

Yesu népî gbõnimî yah wilki pi ò tò sáhpúle

13 Sò yóle, Yesu dɔkɔ yɔli yó yɔ, té wáh sò me nónó tyí, à pé ye. Pé pɔ ò tyí.

14 Sě ye sò, à yah wilki kène népî gbõnimíne, à pi ò tònpiɓile. Ne, pé ne n me pé tnô, pé ne n we n tò pé wey pèpey yo n kɔ yinne.

15 Té tẽnwenɔle pé kɔ nê-á kɔ fě *sétàn yini n wilki n pi.

16 Népi gbõnimí nópi yini we yò: Simole, Yesu òmɔ yin sah Pyerile.

17 Nsyakɔ ànê ò gběndí Nsyõne, pépile, Sebede wěnpì ye sò. A pépi yin sah Gbanersyesile, ké yɔ ye «nónó-á gběnséntáhkì sɔ».

18 Andre tɔ sò me, ànê Filipe, ànê Bartelemi, ànê Matye, ànê Toma, ànê Nsyakɔ, nê-á Alfe píđine. A tahlɔ Tade, ànê Simole, nê-á sò ò sú fɔ yɔ yɔpu sɔkɔ yóle,

19 ànê tɔ Yisikaryoti Yudasile, nê-á pɔ vi Yesu náh.

Yesu gbôtàn pɔ ne, páh òne n tẽ n sɔkɔ

20 Képah náh, Yesu de gbô. Tówú tɔ tuke ò yɔ. Wró ntẽ náh sò me òmɔ ànê ò *tò sáhpú tyí yòke yɔ yɔ tẽnɛ.

21 N gbôtàn-á képah noh sě, pé yuku wěkì tẽ ne, páh kɔ kyɔ à tẽ, té n yo wě tyí ne, ò lékám-á fěkɔ, wáh kah mɔ.

Yesu n̄ tyí kàhnó yáhnkõpu yahle n yo

²² Légbíne, *Liyel ñgbò wěkì kwópu nónó-á wil Yerusalemı soko, pépi ne nkě, *sétàn yõtě Belsebul-á me Yesu soko. Nmò tǎhkì-á à kō, à tē we *sétanne n yini n wilki névye soko.

²³ Képah tēne, à pé ye, té tyah n weki pé tyí sèmirn soko: «Sõ me sétàn yõtě ki fě ñ gblõy yini wilki névi soko?

²⁴ Yõtõrí núkú névye-à tyah wēne n fwo, kéne yõtõrí náh n mo n pi.

²⁵ Kéte nê névye-à tyah wēne n fwo, kéne kéte to náh n mo n pi.

²⁶ Sěntě ó ye, sétàn yõtě-à yuku, à ñ tǎhkì tokı, à tyah wēne n fwo, ñ yõtõrí ki yıki, kè náh n mo n pi.

²⁷ Névi yó ntě náh fě de n pi kětēnpe tǎhkì wòkò, ki ñ gbàn yı tokò, né à náh à tē pukubi. Wàh à tē pukubi te gbí nēne, à ki pyě ñ wòkò yı kwel.

²⁸ Mé kéle n yo yé tyí kègbı yõ: Névye-á tyípêl nónó pólle n pi, ànê Liyel gbyòno pólle, sè ki fě yõ mo pè kō.

²⁹ Nte, névi nê-à *Liyel Mírki gbyo, kè náh n yõ n mo n pi ñ tyí pólle. A ki wũ ké soko.»

³⁰ A képah yo sě pé tyí, pǎh sõnpı yo ne, sétõ-á me ñ soko.

Nónó me Yesu pi ñ yú ànê ñ yúpyéle

³¹ Képah náh, Yesu-á sò me nýãh, ñ yúpyé ànê ñ yú po yini tē kéne gbô yah, té ne tekı mo à kyı à ye.

³² Tówû sò me kǒ tǐ Yesu mo gbĩ, té pè yo ò tyí ne, à noh yò, ò yú, ànê ò yúpyé-á me kégbó. Páh me ké tyí ne, pé à we.

³³ A me yo pé tyí: «Nê me òmo yúne, ànê nónó me ò yúpyé?»

³⁴ Képah náh, névyé nónó-á sò me tǐ à mo gbĩ, à yò pé yah kore vi, té yo: «Yé yah, òmo yú, ànê ò yúpyé me ásô.

³⁵ Névi nê-á Liyel òvìle n pi, òmo ye òmo yúpi, ànê ò yúne.»

4

Sèmuco mìr-ò sèmirkìle

¹ Só yóle, Yesu tǐ me tyah névyéle n kwo Kalile yó-ngbǐ gbòpo soko. Tówû òngbǐ yó po à mo gbĩ. Pè tónkàhnó tǐ tyí, à de kǒ tǐ krótókè yó soko. Krótókè mè sò me yo soko, té tówû pól me tǐnóle yóngbalì.

² A sò me péle n kwo tyi náhnáhle sèmìrn soko, me n yo pé tyí ò kwónó soko ne:

³ «Yé noh! Só yóle, dí yó sò kyì ò swāh, sèmuco mìr-ńsah.

⁴ Wǎh me mìrnó soko, yísyó syíkùlì wǎgbalì soko, kèpye po sè yo.

⁵ Yísyó me syíkùlì yen kwéy tǐ-ńsah légbí yò, té fi súú. Yen gbì náh sò me nénpó, képah ye.

⁶ Gbĩ-á po vyāh sè tǐ, sè kòko. Yǎhnì gbì náh sò me sé tyí, képah ye.

7 Ýisyó me kyı syıkuı pãn nuýó. Pãn nópi me yuku fyãh sé yõ, sè nãh tẽ we pye pi.

8 Nte, ýisyó kyı syıkuı sétãh pèpey soko. Sépi me fi, à kyãh palle. Túkù pyenõ yõgbãm pi, túkù tikitõní pi, sé túkù mó lèkwě pi.»

9 Kèpah nãh, à tõ yo pé tyí: «Níkí-á kı me nê tyí noh noh tẽne, tẽ ñ níkí sah noh.»

Yesu sèmìrn yáhnó yõle

10 Yesu-á yal tówû tnô gbí nêne, nónó-á íkěne ne me ñne, pépi ànê ñ *tõ sáhpú népî gbõnimí me ñne n piki n yah sèmìrkì mè yõle.

11 A mó yo pé tyí: «*Liyel tõrí tyi nónó-á wõbìnóle, sé pnèné ye yépi tẽ wõ kõ, ñte kégbó névyé tyí, tyi pól n yo sèmìrn ó soko.

12 Kèpah soko, pè kı n yah díkídíkí, té pè nãh kwãh yó we n pi.

Pè kı n nohnı, té pè nãh tir yó pĩ n pi.

Né kèpah nãh pi, pè nãhkı pé pi dùkù vi mõ, à pé gblõyne Liyel kõ, té nãhkı pé tyípêl yõnmõnõ we.»*

Yesu sèmuķõ mır-ò sèmìrkì yõ yo

13 Yesu tõ yõ soko yo pé tyí: «Yé nãh sèmìrkì mè yõ pĩ di? Nte, yé kı sèmìrn téló yõ pĩ sõ?

14 Sèmuķõ mır-òle, Liyel wey ye à n mir.

15 Té névyé túkù me, á kı ne wěgbalı sõ, wey-á mir mõ nyãh soko: Pépi-à wey mè noh, nénpó swõ, *sétãn yõtẽ n põ wey mè wilki pé foko.

* 4:12 4.12 - Yah n te Yesayi 6.9 ànê 10 soko.

16 Túkù tǒ me légbí tǔ-̀nsah sǒ. Pàh wey mè noh, pè kè fě n syi nìvìnìnè.

17 Té pè nàh n ye wey mè yàhnìnè n mọ pé sọkọ. Nénpọ swọ névye ye péle. Képah ye, kwlónó-à pè yini tǔ, képah nàh pi, névi-à pè fǒh Liyel wey yinne, pè pé nàh vi súú Liyel wey kǒ.

18 Túkù mó tǒ me, á kɪ ne pǎn tǔ-̀nsah sǒ. Pàh wey mè noh,

19 kèkǒyó tyi fọkọ sǒnọ, ànê tahrɪ ànê tyi nàhnáh dékè n de pé sọkọ. Sépi n pọ wey mè fyǎh, kè nàh n tǔ n we pyele n pi.

20 Névyè túkù mó me, á kɪ ne sétáh pèpèy sǒ: Pépi-à wey mè noh, pè kè fě n syi, ò té pye pi. Túkù pyenọ yǒgbām pi, túkù tikitǒní pi, túkù n mó lèkwě pi.»

Fòtnò ànê sǎh sǎh dú sèmìrkìlè

21 Képah nàh, à tǒ yo pé tyí: «Névi se kɪ fě fòtnò soh, té kɪ dú kwĩnkɪ mọ ké yah, képah nàh pi, kɪ kè dah mọ sě sě kwâh sètàhkì sǒ? A nàh kè dọkọ n mọ n pi ké sǎh-̀nsah di?

22 Tir yó nǔtǔ nàh me wǒbìnóle, nê nàh n wilki n mọ n pi kégbó. Sètǔn sǒ tir yó nǔtǔ nàh n wũ n pi wěkí-̀nkěne.

23 Níkí-à me nê tyí noh noh tǔne, tǔ ò níkí sah noh!»

24 Té tǒ ò syi yo pé tyí: «Yáh tyi nónónè n nohnɪ, yé séle n kyomɪ palle. Yáh no téló tyíle n sǎh dú nêne, Liyel kɪ yépi tọ tyí sǎh n pi kéne dú núkúle, té dòhnìnó nǔtǔ kɪ we yépi tyí yǒ.

25 Kwâh-á me névi nê tyí, dòhnìnó kɪ pɪ ò tyí yõ ntõ. Té, névi nê tyí kwâh nâh me, kwéy nê-á me tẽ tyí, képah to kɪ tẽ syi ò tyí.»

Sèmìrkì nê-á yâh sèmukò finó tyí yõ

26 Képah nâh, à tõ yo pé tyí: «Yé yah, kwâh nê-á *Liyel tǒrí kètòle: Kè me, á kɪ ne dí yó sǒ nê-á sèmukò mir ò swâh sòkò.

27 A me n do ò, à me n yah ò, lékâh ànê ké gbìntõ, sèmukò n ne me fi, n ne n kyâh, à nâh ké dùkùle n pne.

28 Sétáh ye sèmukò mè kǒ kè fi ké gblǒy. Sè kètuke wil à pò dubi pɪ ywǒle, à yí pɪ.

29 Sâh fyò ko te, sèmukò tókò gbí-á nò, à yǚnkwǚkì tókò kyɪ tyah séle n kǒ.»

Mútárdi pi sèmìrkìle

30 A tõ yo pé tyí: «Á kɪ fẽ kwâh nê tókò kɪ *Liyel tǒrí dùkù wǚkì? Képah nâh pɪ, sèmìrkì nê me mé kɪ yâh kɪ yǚne kéle?»

31 Kè me, á kɪ ne mútárdi pi sǒ tyíí. Kè yilo kal sèmukò duke pólle.

32 Té, pàh kè duku, kè n yuku n pò n pɪ yòhkì ògbǚne n kal sèmukò duke pólle swâh sòkò. Nte, yǚngbàn gbekɪ dò, kèpye kɪ fẽ pò syè pɪ ké sòkò.»

33 Sǚ ye Yesu n kwò névyele sèmìrkì mè duke nâhnâh sòkò. A sǒ me séle n yâh n yǚne sé nòhnìpu pǐ pǐ tǚne.

34 A náh sò n yãh pé tyí sèmìrn mí-ńkĕne. Tě, pàh me pé yahle, òmò ànê n *tò sáhpúle, ǎ sé pól yah yo n dal n mọ pé tyí.

Yesu yáhpékè yó yĩn mọ yó-ńgbě sọkọ

35 Ké lésò ńvĩne, Yesu yo n *tò sáhpú tyí ne, pè ye, pé yuku yó-ńgbě kahnune.

36 Képah sọkọ, pè me yal tówù tnô. Wãh sò me krótókè nê, n tò sáhpú sọkọ òne képah sọkọ. Tě krótónenó yísyó to sò me òne.

37 Dò, yáhpékè yó kô, à nine n tọkọ n mọ krótókè sọkọ pópó, kè pọ n tyah yúkúnóle nine.

38 Tě légbĩne, Yesu sò me sě tě n do krótókè sọkọ náh ùnne, té me n yò sah yòsah yò. Képah sọkọ, n tò sáhpú kyí à yilki mọ, té yo n tyí ne, kwó-ò dí, yọ-á n tyah pé yónóle, kè kó me tirlẹ òmọ tyí ni?

39 Wãh do yuku, à díri kô yáhkí yò, té yo yo tyí: «Yĩn! Tě syísyí!» Yáhkí núkú yĩn, tyah pi súmm.

40 Á me yo pé tyí: «Kù pi, té tíkí yé tě sě? Yé náh tǔnì sě ní yò dí?»

41 Képah tēne, tíkí me pè kah tě. Pè tyah wēne n piki n yah ne, ne òkù nê se dí mēne, té yáhkí ànê yo to n sah n tyí yò ni?

5

Yesu sétàn yĩni wilki dí yó sọkọ

1 Képah náh, pè kyí yĩni tě Kalile yó-ńgbě kahnune, Yerasa tãn sétáh yò.

2 Yesu-á fyò n tiki krótókè sòkò, nénpó swò, dí yó wil léyâl wró, à pò à yohni. *Sétõ sò me kéne dí sòkò.

3 A sò me tẽnóle léyâl wró. Névi náh sò fẽ à pukubi n sah n pi kěy fyéle pólle.

4 Kèyáhle, pè níkěne kárn mò n gbyèh tyí, n té kěló mò n gbàn tyí, té à kárn kwòkì, n té kěló kòlì. Káh pi sě, ké tãhkì náh sò me nnì yó nítè sòkò, kì fẽ à tẽ sah.

5 Ké lékâh, ké gbìntõ, à sò níkěne n ne n kò n kò léyâl wró ànê ymò sòkò, n ne n de n syi, n gblõyne n pi n yo n kò dyèhle.

6 Té, wáh Yesu we fíí sòkò, à to pò gbètukunò di n yah.

7 Té de syi yínpõ n gběne ne, Yesu, pé yòtah Liyel pi, kwâh nê se à n yah n kò pé tyí ni? Páh nne n ni Liyel yín yõ, à káh pé fõh.

8 Yesu sò me n yo sétõ mè tyí ne, à wil dí mè sòkò, képah ye.

9 Té me à piki yah ne, n yín se sõ? A me ne, pé yín-á Méfwóbé Kwĩnkile. Páh me dò, képah-á.

10 Té me à gbah ni ne, à káh pé yíni wilki kwil mè sòkò.

11 Ké nénpó sòkò, sel kwĩnki yísyó sò me n yah n yõ n kò yõlì yõ.

12 Sétàn nópi Yesu ni ne, páh kì wil dí mè sòkò, à ye pé kò, pé de sel nópi sòkò.

13 A me ké wěkìle sè kò. Légbíne, sè me wil dí mè sòkò, té kyì de sel nópi sòkò. Sel kwĩnki ye sò séle, sè kì fẽ nò sel kèyõ kénkòle, té me téyõ.

Sè núkú to tiki tükùtùkù, à kyí de yó-̀ngbě soko, kè kǒ kè sè yǒ.

14 Kǎh pí sě, sel nópi fěpu to soko kwil niyó, ànê gbno soko, à kyí ké dùkù yo kǒ no tyí. Képah tēne, névye po ké nénpó, à po ké dùkù yah, sǒ-á kè pí.

15 Pè kyí Yesu tnô, té kyí dí mè we, nê-á sò sétàn kwĩnkile déntěnóle ò soko. A sò me flo mo kǒ tē, té me tírr névye tyí kǒle. Kǎh pí sě, tiki pé tē.

16 Tir nê-á pí sétàn nédéné soko ànê sel tyí, sé wépú tyah séle n yǎh pé tyí.

17 Képah soko, kwil tǎn tyah Yesule n ni ne, à yal pé kwil soko.

18 Kǎh pí sě, Yesu-á n dokò krótókè soko gbí nēne, sétàn-á wil dí nê soko, à tyah òne n ni ne, à ye pé kǒ pé ò sò tē.

19 Nte, à náh ké wěkìle à kǒ, té me yo ò tyí: «Á syí n kyí gbô! Tē-̀ngbě-á ò nìgbèkì soko pèpòrì ògbě nê pí á tyí, ò kyí ké yah yo pé tyí!»

20 Dí mó ntyínò ò syí kyí kéle n yo n kǒ Kwlogbām kwil sétáh yǒ, tir nê-á Yesu pí ò tyí. Nónó pól-á kéle n nohnì ò tyí, pé gbǎn du.

Yayirusi písê yĩlkinmɔnɔ, ànê pi nê-á tũ Yesu fwòmɔn tyí

21 Képah soko, Yesu-á yĩni tē yó-̀ngbě kahnune krótókè soko, à sò me yóngbalì soko, té tówù ògbě yó po à mo gbí.

22 Légbíne, *Liyel ní-ńsah wòkò yòtḗ yó yīni tḗ nénpó, nê yīn-á Yayirusile. Wǎh Yesu we, à gbètukunḡ di ò yah,

23 tḗ à gbah ni ne, pé písê lépir-á me n tyah kúnóle. Páh òne n ni, à pḡ kyi ò gbǎn sah ò yō. Képah-à pi, wǎh ki de, tḗ ki min we.

24 Képah sokḡ, Yesu me yuku òne. Tḗ tówú ògbḗ sò me ò sò tḗ, me à fyǎh sah ywḡ ywḡ pólle.

25 Nénpó sokḡ, sê yó sò me náhle n yo tyé-ńkḗne ye gbǒninó.

26 A sò kah kwlo kègbile ò gblǒy mónó sokḡ sènpḡbi náhnáh tyí. Ò gbǎn yī pól sò tyḗ, tḗ kè náh kwáh wilki ò yam sokḡ. Kè pyḗ me gbe óle n gbe mo.

27 Pi mè-á Yesu tyí noh ńyǎh sokḡ, à de tówú niyó ò náh tḡne, à kyi tḡ ò fwòmḡn tyí.

28 A sò me n sò ò fḡkḡ sokḡ ne, páh náhki we tḡ ò fwòmḡn ó tyí, pé ńyân-á náhki tyḗ.

29 Wǎh mó núkú tḡ ò fwòmḡn tyí, nénpó swḡ, ò náh yónó tyḗ. A kè kyḡmi we ò wil sokḡ ne, páh de.

30 Nénpó swḡ, Yesu pḡ ne, táhkì yó-á wil pé sokḡ. A me ò yah vi tówú niyó, tḗ piki yah ne, nê se tḡ pé fwòmḡn tyí ni?

31 Ò *tò sǎhpú me yo ò tyí ne, à kó me n yah tówú à mo gbḡ, me à fyǎh sah ywḡ ywḡ pólle, tḗ à tḡ me n piki n yah ne, nê se tḡ pé tyí ni?

32 Nte, Yesu me vi ò gbòplo névyḗ yah. A sò me ké tyí ne, pé ké pí-ò we.

33 Képah tēne, pi mē wil n syah tíkí tyí. Nmo sò pĩ tir nê-á pi ñ sɔkɔ. A yuku kyɪ gbètukunɔ di Yesu yah, té ké gbɪ yo dal mɔ à syah.

34 A mó yo pi mē tyí: «Ñ písê, ñmɔ yō sēnó ye ñ de mɔ. Ne n yuku yèvinɪ sɔkɔ, á nýân tyɛ.»

35 Wǎh me képah yónó sɔkɔ sě, tēntò yó wil Liyel ní-ńsah wòkò yòtē dí gbô, me pɔ n yo kéne dí tyí ne, ñ písê-á ku. Nkě, yō se tō me ké tyí, à tō kwó-ò díne n kwɔ nɪ?

36 Té Yesu náh ñ níkí sah képah tē noh pé tyí, té me yo Yayirusi tyí: «Káh tíkí pi, sě ó sě n yō!»

37 Képah tēne, pǎh n sɔkɔ, à náh fě syi ne ñ sò tē, à wil Pyerɪ ànê Nsyakɪ ànê ñ gběndí Nsyō tyí sɔkɔ.

38 Pǎh kyɪ de Liyel ní-ńsah wòkò yòtē dí gbô, Yesu kyɪ névyɛ wɛ, pé me n gbo n mir n kō, me n de n syi.

39 A me de wòkò, té yo pé tyí: «Kû pi, té yé n gbo n mir n kō sě? Piri náh ku. Dónó ó ye à n dɔ.»

40 Névyɛ-á képah noh, pè tyah kóle ñne n ko. Képah sɔkɔ, à pé pól wilki wòkò sɔkɔ. Té piri sú, ànê ñ yú, ànê ñ tò sáhpú népí tǔmí ó de ñne piri mé-ńsah wòkò.

41 A me piri gbò tē, té yo ñ tyí pé kwil wɛy sɔkɔ: «Talita kumi!», nê-á pè n ye: «Pípír, mé kéle n yo á tyí, yuku!»

42 Ké nénpó swɔ, piri yuku tyah n kɔ. Kǎh pi sě, kè névyɛ pól gbǎn kah du. Légbíne, ñ ye gbõninó ye sò.

⁴³ Tέ Yesu με ké gbah yo pé tyí ne, pé káh ye névye pĩ ké sɔkɔ, nkě, pè mó yòkele à kǒ à yǒ.

6

Nasarēti kwil névye náh sě Yesu yǒ

¹ Yesu-á yal ké nénpó, à kyɪ ànê n *tò sáhpúle, wǎh sǒ kyǎh kwil nê sɔkɔ.

² *Mɪ mɪ yòh só-á nɔ, à kyɪ de *Liyel ní-ńsah wòkò, à tyah névyele n kwɔ. Nónó-á sǒ me n nohnɪ n tyí, pé nálnáh gbǎn du. Pè tyah n yo wě tyí ne, nýǎh se à we kéle, nê se à kǒ kéné lékám ànê tǔnwɛnɔle, à fě gbɪl mè dùkùle n pɪ nɪ?

³ Nkě, ñmɔ kó sésân sé-ò mènɛ, Mari pídíne nɪ? N yúpyé kó Nsyakɪ, ànê Yose, ànê Yude, ànê Simole nɪ? Ñmɔ dósyó kó pé pól wró sɔkɔ ásô nɪ? Képah sǒnɔ ye pè kǒ, pè náh sě n yǒ.

⁴ Képah sɔkɔ, à me yo pé tyí: «*Liyel tǔntò syínyo-ò me gbɪlkinóle névye pól tyí, à wil n sáfó, ànê n no, ànê n kétéǎn tyí sɔkɔ. Pépi ye ñne n yilo.»

⁵ Képah ye Yesu kǒ, à náh fě gbɪl yó ntě pɪ pé tyí, né yámpú yísyó ó yǒ náh. A n gbò sah pé yǒ pè kǒ pè de.

⁶ Tέ, n kwil névye-á yahle sǔnóle n yǒ sě, kè n gbǎn du.

Yesu n tò sáhpú népî gbǒnimí tǒ

Képah náh, à yuku gbòplo kwlo sɔkɔ, à kyɪ névyele n kwɔ n kǒ.

⁷ Képah sɔkɔ, à n̄ *tò sáhpú népî gbõnimí ye, té tyah péle n̄ t̄õ ními nímine. Té t̄enwenɔle pé k̄õ *sétàn yõ.

⁸ Té me kè gbah yo pé tyí ne, pàh n̄ sɔkɔ pé kóló sɔkɔ, pé káh kwáh yó nt̄ẽ tɔkɔ, à wil pé kɔ kɔ lépló tyí sɔkɔ. Pé káh yòke tɔkɔ, pé káh pilki tɔkɔ, pé káh pó tɔkɔ dah mɔ pé yõ.

⁹ Pé lékyêh wɔ dyi, té pé káh fwòmɔlɔnɔ nínó nínó mɔ.

¹⁰ Té t̄õ yo pé tyí: «Yâh kyi kwil yó sɔkɔ, té twah nê tyí, yé t̄ẽ n̄n̄pó, kè pɔ nɔ yé yálnó tyí.

¹¹ Kwil nê névye-à kyi yahle ne, yé káh twah pé tyí, té yahle yé wey nóhnóle, yâh n̄ wil kéne kwil sɔkɔ, yé yé gbyêh n̄ngbõ kwer n̄ kwe n̄n̄pó. Képah ki pi gbáhdýâh d̄ínsâhnóle pé tyí.»

¹² Képah sɔkɔ, n̄ tò sáhpú me sɔkɔ, à kyi tyah n̄ yo n̄ k̄õ no tyí ne, pé pé n̄nɔ vi mɔ.

¹³ Pé sò me sétàn náhnáhle n̄ ȳini n̄ wilki névye sɔkɔ, té me yámpú náhnáhle n̄ de n̄ mɔ, pàh n̄iri tuke te t̄ẽ tyí.

Wèlnwìlkì-ò Nsyõ ku dùkùle

¹⁴ Légbíne, yòt̄ẽ d̄í *Yerɔdi sò me Yesu tyípínóle n̄ nohn̄i, tir yó náh, n̄ ȳin sò me n̄ gbilki ywõ ywõ pól sɔkɔ. Túkù ne nk̄ẽ, *Wèlnwìlkì-ò Nsyõ-á n̄ne, wãh n̄ syi wil lékyî wró, à pɔ. Képah-á à k̄õ, à t̄ẽ we gb̄ilnóle n̄ pi.

¹⁵ Té, túkù mó ne, *Yeli-á. Túkù t̄õ ne, *Liyel t̄ẽnt̄õ syínyo-ò yó-á, n̄gbò Liyel t̄ẽnt̄õ syínyo-ò s̄õ.

16 Yerōdi-á sépi pól yónó noh sě, à ne, Nsyō-á, páh sò pé kō pé n̄ yō kām, té wǎh n̄ syi yuku gbáh!

17 Kègbi yō, Yerōdi sò pé kō ne, pé Nsyō tē pukubi dah mō wòkònpèkè sòkò. Yerōdyadi yīn ye à kō, à kèpah pi. Yerōdi sò pi mè tókò kyile. Té n̄ gběndí Filipe kyi ye lésō n̄ne.

18 Nte, Nsyō ye sò ké gbile n yo Yerōdi tyí ne, à náh yīne à n̄ gběndí kyi tókò.

19 Káh pi sě, Yerōdyadi sò me Nsyō dyole n yo, me n̄ kònmō-ńsahle n yah n kō. Nte, à náh me ké syō-ńsah we.

20 Yerōdi sò me Nsyō yōle n syki, kèpah ye. A sò me n̄ tikiile n pi. A pī ne, wǎh me tírr pi kēne Liyel yah. Wǎh sò n̄ welole n nohn̄i, ké n̄ fòkò fěki. Té, n̄ welo tyí sò kah nō n̄ tyí.

21 Kèpah sòkò, Yerōdyadi pò syō-ńsah yó we, Yerōdi dúbínó yòh v̄n̄p̄on̄o syáh syah sóle. A sò n̄ tōrí sòkò né-ńgbn̄o ye, àn̄ê n̄ méfwóbé yòtāmne, à tahl̄i Kalile yòtām pól tyí, té yòke ńgbě pi pé tyí.

22 Kèpah sòkò, Yerōdyadi písê de kyi yō yi pé mé-ńsah wòkò. Káh pi sě, n̄ tyí nō Yerōdi àn̄ê n̄ náh nénye tyí. A me yo pípír tyí ne, wǎh ki me kwáhdúkú n̄ê tyí, à kè yo, páh ki kéle à kō.

23 Té n̄ wo n̄ tyí ne, wǎh ki kwáhdúkú n̄ê tyí yo, páh ki kéle à kō, káh ki sō pi pé yòtōrí tónine.

24 Wǎh yo sě, pípír me wil kyi n̄ yú piki yah

ne, pé se yĩne pé kwâh nê tyí yo ni? N yú mó núkú à syah ne, à kyí yo ò tyí ne, à Wèlnwìlkì-ò Nsyõ yõle pé kō.

²⁵ Képah tēne, pípír núkú ò syi súú, à pò yo yòtē dí tyí ne, à pò pé kō Wèlnwìlkì-ò Nsyõ yõle yěvíkì sòko núkúnúkú yò.

²⁶ Wăh yo sē, kè pì yèkwòrile yòtē dí Yeròdi tyí kègbile. Té, à nâh sò me ké tyí ne, pé pé vyăh vi pé wónó yĩnne pé nâh névye yí yah.

²⁷ Nénpó swò, yòtē dí núkú ò tyah syíkípú sòko ne yó tekú mò ne, à kyí Nsyõ yõ kām pò. Kéne dí mó kyí Nsyõ yõ kām wòkònpèkè sòko,

²⁸ té pò kéle pípír kō yěvíkì sòko. Á mó kyí kéle ò yú kō.

²⁹ Nsyõ *tò sâhpú-á képah noh sē, pè pò ò lékó tòko, à kyí yĩ léyēkì sòko.

Yesu népî kèyõ nínó kyegbām kō yòkele

³⁰ Képah nâh, Yesu tònpi bi pé syi pò ò tnô, à pò pé tyípinì ànê pé névye kwò dukù pól yo à wēki.

³¹ Té légbíne, pópú ànê sókópú sò me dò. Yòke yõ yõ wró ntē nâh sò me Yesu ànê ò *tò sâhpú tyí. Kâh pì sē, à yo pé tyí ne: «Yé pò, á yuku gbòpòle, yé kyí mi yah kwéy.»

³² Pè me de pé yahle krótókè yó sòko, à gbe mò névyele.

³³ Té névye nâhnâh-á pè we sókó-ńsah, pè n gbe n mò sē, pè me pĩ, fí nê-á pè n yuku. Pè

núkú wil ywõ ywõ pól soko tólóle gbáhkì yõ, à Yesupi dyàh tẽ kyì de nénpó.

³⁴ Yesu-á wil krótókè soko, té tówû ñgbẽ mè we sẽ, pé yãm à tẽ. Tir yó náh, pé sò me, á kù ne yípẽ sõ, fẽ-ò kẽne sé tyí. Képah soko, à tyah péle ñ kwò tyi náhnáhle.

³⁵ Nví-á pò nò, ñ tò sáhpú nò de ñ tnô, té yo ñ tyí ne, nví-á syi pò nò, té tyah mè-á gbènmònole.

³⁶ Wáh náh ké wěkìle névye kō, pé kyì yōke yah dwe gbòplo gbno ànê kwlo soko.

³⁷ A me yo pé tyí ne, pépi yōkele pé kō, pé yō. Pé me à piki yah ne, à se ne, pépi yōke dwe pé kō pó pló lègbāmne nì?

³⁸ A me pé piki yah ne, búrn pló sō se me pé tyí nì? Nkẽ, pé kyì yah te. Páh kyì piki yah, pé pò yo ñ tyí ne, búrn pló kwló-á me pé tyí, ànê yěnkycò pló nínóle.

³⁹ Képah tẽne, Yesu ne, pé névye pól kō pé kō tẽ òn ònne filkì yõ.

⁴⁰ Névye mó kō tẽ òn ònne, lèkwěkwè ànê tíkiníní pó gbām gbāmne.

⁴¹ Páh kō tẽ te, Yesu búrn pló kwló ànê yěnkycò pló nínó nópi tókò, à ñ yah yõ yínyõ, té wèkì Liyel tyí, té búrn kwókù pé kō ne, pé dibi névye kō. Té yěnkycò nópi tó dibi névye pól kō.

⁴² Képah tẽne, pé pól yõ tã,

⁴³ té pé tã pé búrn ànê yěnkycò yónkwlonò téló tuke mò gbétóló yí gbōninóle.

⁴⁴ Té nónó-á sò yōke mè yõ, pé sò me díbí népí kèyõ nínó kyegbāmne.

Yesu kɔ yó-̀ngbě yõ

45 Nénpó swɔ, Yesu n̄ *tò sáhpú kyĩ mɔ, pè de krótókè sɔkɔ nɛ, pè yuku pé yahle yó-̀ngbě kahnɛ, Besayida kwil sɔkɔ. Péwɔ mó tówú fin mɔ.

46 Wǎh pè fin mɔ tɛ, à yuku yõli yó yõ, à kyɪ Liyelle n ni.

47 Lékâh-á mɔ, krótókè sò mɛ yɔ niyó, té ñmɔ ó mɛ kènkwǎh yõ.

48 Dõ, à ñ tò sáhpú wɛ, yǎhkí mɛ péle n yohni, pè mɛ n kwlɔ krótókè vyónmɔnto-̀nsah. Tyah dal gbíne, à tyah n kɔ n yuku pé tírrle yɔ yõtah, à n yuku pé kàl-̀nsah.

49 Pǎh à wɛ, à n kɔ sě yɔ yõtah, pè wɛ nɛ, lékó mírki yó-̀á, té tyah n de n syi.

50 Pé pól-̀á à wɛ sě, pé sǎm yɔkɔ. Ntɛ, nénpó swɔ, à yɔ mɔ pé tyí nɛ: «Yé yé ni syǎh, ñmɔ ye. Yé káh tíki pi.»

51 Té de krótókè sɔkɔ pé tnô, yǎhkí mó yĩn. Kè pi gběndùnnɛ náhnáh pé tyí.

52 Wǎh búrn pi dò gbíl nê sɔkɔ, pè náh sò ké dùkù pĩ, kèpah ye. Pé lékám sò kah tekɪ ké pínóle.

Yesu yámpú dénmonɔle Yenesareti sétáh yõ

53 Pǎh yó-̀ngbě kah, pè yĩni tẽ Yenesareti sétáh yõ, té pé krótókè yĩn mɔ yɔ vyǎh tyí.

54 Pǎh fyò n tiki krótókè sɔkɔ, névyɛ núkú Yesu yah pĩ.

55 Pàh noh ne, wăh me ñyăh soko, pè n tyah pé yámpúle n twah pé sě sě yí soko ywõ ywõ pólle, ne n po n po ñ tyí.

56 Yesu-à de ñyăh òkù nê soko, kwil ñgbno ànê kwílpyé ànê gbno, névye pé yámpúnole n twah n po ñ tyí pé tówù tükè-ntàn soko. Pè n po n tyah ñne n fal ne, à ye pé kõ, pé we tũ ñ fwòmɔn vyăh ó tyí. Nónó pól-à fyò we tũ ñ fwòmɔn vyăh tyí, pè n mó n de.

7

Farisiyēno ñgbò wăl kólóle

1 Só yóle, *Farisiyēno ànê *Liyel ñgbò wěkì kwópú tükù wil Yerusalem, à tuke mo po Yesu tnô.

2 Pè po kè kyom we ne, ñ *tò sáhpú tükù-á me n yõ gběnsille. Pè nâh me pé gbăne n kãm n wu pé ñgbòtăn tyí kôle.

3 Té, Farisiyēno ànê *Nsyifuno téló pól sò ñgbòtăn wěkì mè sàhnóle n ko. Pè nâh sò yõkele n yõ, né pè nâh pé gbăn kãm wu palle.

4 Pàh wil po yoh soko, pé nâh yõkele n yõ pé kãm nwèl-ñkēne. Pè sò pé ñgbòtăn pi òkùnó nâhnâh yísó to tẽ yí kègbile, sã-á wóhno, ànê pní, ànê kēsên [ànê sě sě yínó] wúnó òkù pèpeyne.

5 Képah ye, Farisiyēno ànê Liyel ñgbò wěkì kwópú me Yesu piki yah ne, kù se pi, té ñ tò

sáhpú náh me ñgbòtãn tyi sàhnóle n pi, té n yó pé gbãñ kãmnwu-ńkẽne ni?

⁶ Képah soko, à me yo pé tyí: «Gbı lésõ me *Yesayi tyí, wãh Liyel wey nê yo yépi vyëy nini wékípú tyí soko. Së ye sò à wãrkı sah kéle: <Kéne névyele, pé ńne n gbilki vyãh ó soko, té pé ni me fíí ńne.

⁷ Nírı nê-á pé n ne n pi ńmõ tyí, nònó ye kéle. Tir yó náh, kwónó nê-á pé n ne n kõ, névyele sàhnó ye kéle, ńmõ tyí náh.»*

⁸ Yesu tõ yõ soko yo pé tyí: «Yépi Liyel tyi kònsàhnóle n milki, ñ té névyele tyi sàhnóle n pi.

⁹ Yë n gbah n tẽ Liyel tyi kònsàhnó yahle, ñ té yé ñgbò wãlle n kõ!

¹⁰ Sõ-á sò *Moyisi yo ne, névi-á yĩne à ñ sú ànê ñ yũne n gbilki. Képah náh pi, névi nê-à ñ sú ànê ñ yú yilo, tẽ-á yĩne kònmõnõle.

¹¹ Nte, yépi névyele n kwõ ne, névi-à yo ñ sú tyí, képah náh pi, ñ yú tyí ne, páh sò ne, pé kwãh nêne à kõ, páh kéle Liyel kõ te.

¹² Yë ké gbı syi tẽ kõ ne, à náh tõ yĩne à tir yó pi ñ sú tyí, képah náh pi ñ yú tyí.

¹³ Kéne pi dukù soko ye, yë Liyel wey pi nònó tirle yé ñgbò wãl kwónó soko. Anê yë n tõ sãnkno náhnãhle n pi.»

Tyi nónó-á névile n silki Liyel yah

¹⁴ Képah náh, Yesu ñ syı tówû ye tuke, té yo pé tyí: «Yé pólle, yé noh ń tyí, yé mó pi ne,

* **7:7** 7.6 ànê 7 - Yah n te Yesayi 29.13 soko.

15 kwâh yó ntě náh n wil kégbó, à n de névi soko, té kɩ fě tě silki. Té, tyi nónó-á n wil névi soko, sépi-á n silki ñne. [

16 Níkí-à me nê tyí noh noh tɛne, tě ñ níkí sah noh!]

17 Yesu-á yal tówû tnô, té kyɩ de gbô gbí nêne, ñ *tò sáhpú ñne n piki n yah sèmirkì mè yòle.

18 A me pè syah ne, lékám kě névyè se pépi tɔle ni? Pè kó pĩ ne, névi-á kwâh nêne n dah n mo ñ vyãh, képah náh fě tě silki n pi ni?

19 Kè náh n de ñ ni soko. Kãh ñkɛne n de ñ kèkürkì soko, à kɔ à n kyɩ n wilki n kwe, wãh de filkì. Kéne wey soko ye à yo pé tyí ne, yòkeno pól-á kɩ fě yò.

20 Té tɔ yo pé tyí: «Tyi nónó-á n wil névi foko, sépi ye ñne n silki Liyel yah.

21 Foko sɔno túkúni nónó-á n wil névi soko, sépi ye à kɔ, à ñ minne n pi fòfíkì soko, ànê yĩbe, ànê kònmono,

22 ànê syó yò yíkinó, ànê yí yúkú-ńkɛ soko, ànê népékè, ànê yíví, ànê sen kú-ńkɛ soko, ànê dyó yónó, ànê névyè yĩn yíkinó, ànê gblɔy gbílkinó, ànê tɔ lékám kě soko.

23 Kéne tyítúkúni pól n wil névi soko, à ñne n silki Liyel yah.»

Yesu sétõ yĩni wilki népô sê yó písê soko

24 Képah náh, Yesu yal nénpó, à yuku Tiri sétáh yò. A kyɩ wõbɩ twah gbô yó soko. A náh sò me ké tyí ne, ne pĩ ne, páh me nénpó. Té, à náh tě we wõbɩ.

25 Nénpó swɔ, pi yó sò me, *sétòle n̄ písê sɔkɔ. Wǎh Yesu tyí noh sɛ̃, à núkú pɔ gbètukunɔ di n̄ yah.

26 Pi mènɛ, *Nsyifu ne náh sò n̄ne. A sò dubi Siri sétáh yõ, Fenisi sɔkɔ. Wǎh pɔ, à sò me Yesule n ni ne, à sétõ yĩni wilki pé písê sɔkɔ.

27 Képah tɛ̃ne, Yesu me yo n̄ tyí ne, à ye wɛ̃npĩ ñgbò kɔ̃, pè yõ t̃õ. Wɛ̃npĩ yòke náh yĩne kè tɔkɔ mɔ pǎhnpye k̃õ.

28 Pi mè mó yo n̄ tyí ne, gbɪ-á, pé Tɛ̃-ñgbɛ̃. Nte, wɛ̃npĩ-á yòkele n yõ, yɛ̃nmîr nónó-à n syɪkɪlɪ sétáh, pǎhnpye kó ñkɛ̃ne sɛ̃pile n t̃õ n yõ nɪ?

29 Képah sɔkɔ, à yo pi mè tyí: «Á wey mè yĩnne, á syɪ n to n yuku. Sétõ ye wil á písê sɔkɔ.»

30 Kǎh pi sɛ̃, à me n̄ syɪ to yuku gbô, à kyɪ n̄ písê we sɛ̃nóle sɛ̃ sɛ̃ kwáh yõ. Sétõ sò wil te n̄ sɔkɔ.

Yesu níkítú màhmàhkì wékí-ò yó de mɔ

31 Képah náh, Yesu yal Tiri sétáh yõ, à kyɪ sɔkɔ Sidõ kwille, té pyɛ Kwlogbã̃m kwil sétáh kah, à yuku Kalile yɔ̃ t̃inne.

32 Nósýɔ me níkítú yó tɛ̃ pɔ n̄ tyí, màhmàhkì wékí-òle, té me à ni ne, à n̄ gbò sah n̄ yõ.

33 Képah sɔkɔ, à dí mè tɛ̃ wil, à gbe mɔ tówûle, à kyɪ n̄ kèngblo dah mɔ dí ní sɔkɔ, té s̃in mɔ, à tuke n̄ nénpórí tyí.

34 Tɛ̃ n̄ yah yõ ỹinyõ, à mɪ dɔkɔ, té yo dí tyí pé kwil wey sɔkɔ: «Efata», nê-á pè n ye: «Yɪkɪ n mɔ.»

35 Nénpó swɔ, dí ní yíkí mɔ, ò nénpórí de mɔ, à tyah n wẹkí tírr.

36 Té, Yesu me pè sni ne, pè káh kéle n yo n kǒ névye tyí. Té, wǎh péle n sni sǒ, pè pyě wǎnne n mɔ ké yónkǒnɔ yǒ.

37 Pé gbǎn kàhndunɔ tǔ tyí, pè tyah n yo wě tyí ne, gbi yǒ, ò tyípínó pól-á me kah ple! Wǎh níkítùbi níne n yíkí, té kèdyòni nénpóríle n de n mɔ.

8

Yesu népî kèyǒ nínó kǒ yǒkele

1 Kéne sèpìn sɔkɔ, tówù òngbě yó tǒ sǒ me tükènmɔnɔle Yesu tnô. Té yǒ yǒ kwâh nâh sǒ me pé tyí sě, à ò *tǒ sáhpú ye, té me yo pé tyí ne,

2 tówù mè yǎm-á me pé tǔ. Pé sèpìn tǒnì-á ànê péwɔle yò, té yǒ yǒ kwâh nâh me pé tyí.

3 Páh kɪ pè fin mɔ, pè sɔkɔ kwekule, pǎh kɪ kah kwɔ wěkì yah. Pé tókù-á n wil fíí sɔkɔ.

4 Képah tǔ sɔkɔ, ò tǒ sáhpú yo ò tyí ne, pé se kɪ fě we nýǎh yǒkele gběnnɪ mè sɔkɔ, kɪ pè kǒ, pè kɪ yǒ tǒ nɪ?

5 A me pè piki yah ne, búrn pló sǒ se me pé tyí nɪ? Pè me ne, kwǎrnínó-á.

6 Képah sɔkɔ, à tówù kǒ pè kǒ tǔ sétáh, té búrn pló kwǎrninɔ nópi tɔkɔ, à weyne Liyel kǒ, té sè kwɔkɪ ò tǒ sáhpú kǒ ne, pè syi dibi névye kǒ. Pè mó sè syi dibi pè kǒ.

7 Yěnkýòpì yísyó tɔ sǒ me pé tyí. A wẹkí Liyel tyí sé tyí yǒ, té ne, pè sé tɔ tɔkɔ dibi pè kǒ.

⁸ Képah tẽne, pé pól yõ tõ, té n tò sáhpú yónkwlonɔ téló tuke mo tɔko yí kwãrnɔ.

⁹ Té nónó-á sò me nɛnpó, pè nɔ nɛpî kèyõ nínó kénkõle. Képah náh, à pè fin mo,

¹⁰ té mó núkú de krótókè sɔko ànê n tò sáhpúle, à yuku Dalmanuta kwil sétáh yõ.

Farisiyẽno gbíl yah kõ Yesu tyí

¹¹ Képah tẽ sɔko, *Farisiyẽno pɔ tyah yékâble n pi Yesule, té n sòle n mo n yah ne, à gbíl yó pi pé yah, nê-á kè wẽki n pi ne, wáh n wil Liyel tyí.

¹² Képah sɔko, Yesu mi dɔko náhnáh, té yo pé tyí: «Kû pi, té kwey gbí névyè gbílne n yah n kõ? Kègbi yõ, mé kéle n yo yé tyí, gbíl yó ntẽ náh pè wẽki n pi!»

¹³ Té yal pé tnô, à de krótókè, à yuku yó-ngbẽ kahnɛ.

Yesu tò sáhpú lékám tékínóle

¹⁴ Légbíne, Yesu *tò sáhpú sò pé dyɔ fwo yõke tókónóle. Búrn pó núkú ó sò me pé tyí krótókè sɔko.

¹⁵ Képah sɔko, Yesu me kè gbah yo pé tyí: «Yé yé gblɔyne n kyomɪ *Farisiyẽno ànê *Yerɔdi búrn dɔko dɔko kwâhle.»

¹⁶ Wáh yo sɛ, n tò sáhpú yékâb mo ne, búrn kɛ yĩn-á à kõ, à képah yo.

¹⁷ Wáh pè kyomɪ we, à pè piki yah ne, kû se pi, té pè yékâble n pi búrn kɛ yinne ni? Pè kó tõnì me ké tyí yah we sɛ ni? Pè kó kè pĩ ni? Pé lékám se me víkéntũnole ni?

18 Yí-á me pé tyí, pé kó me n yah ni? Ní me pé tyí, pé kó me n nohni ni? Pé dyo kó me n kwne ni?

19 Páh lésõ búrn pló kwló kwɔki dibi népî kèyõ nínó kyegbã m kō, gbétóló yí sō se pé kwel yónkwlonole ni? Pè me ne, gbõninó-á.

20 A tō pé piki yah ne, té páh lésõ búrn pló kwãrninɔ kwɔki dibi népî kèyõ nínó kō, tɔkɔ yí sō se pé kwel yónkwlonole ni? Pè me ne, kwãrninɔ-á.

21 Képah sɔkɔ, à yo pé tyí ne, té, pé náh tōni me ké tyí yah we sē ni?

Yesu yítû yó yí yiki mɔ Besayida kwil sɔkɔ

22 Yesu ànê ñ *tò sáhpú-á kyí yíni tē Besayida kwil, nósýɔ pɔ yítû yóle ñ tyí, té à ni ne, à tū ñ tyí.

23 Yesu me yítû mē gbò sɔkɔ tē, à wil ñne kwil gbòpɔ, té sīn mɔ ñ yí sɔkɔ, té ñ gbàn sah ñ yō, té à piki yah ne, à se me n yah ni?

24 Yítû dí ñ yah yō, té ne, páh me névyele n yah yirkòò, sésân sō. Té, páh me n kɔ.

25 Yesu tō ñ syí ñ gbàn sah dí yí yah. Káh pɔ sē, à fē n yah pñepne, à de. A yiyin pólle n wah n pne wē sɔkɔ.

26 Képah sɔkɔ, Yesu yo dí mē tyí ne, à sɔkɔ ñ gbô, té à káh syō kwil sɔkɔ.

Pyeri kè yo ne, Yesu-á Liyel ne tékinmɔnole

27 Képah náh, Yesu ànê ñ *tò sáhpú yuku Filipe Sesarí gbòplo kwlo tinnē. Páh me wēkì yō

gbí nêne, à pè piki yah: «Névye tẽ tyí, ímole, nê me?»

²⁸ N tò sáhpú ne, tókù-á ne, *Wèlnwìlkì-ò Nsyõ-á òne. Tókù mó ne, *Yeli-á. Tókù tõ ne, *Liyel tẽntõ syínyo-ò yó-á òne.

²⁹ A me tõ pè piki yah: «Té yépi tẽ tyí, ímole, nê me?» Képah tẽne, Pyeri yo ò tyí ne: «*Krista ye ále, Liyel-á ne, páh kí nê teki mo.»

³⁰ Képah sokò, Yesu pè sni ne, pè káh kè yo ne syah.

Yesu ò kúnó ànê ò yúkúnó tyí yo

³¹ Képah sokò, Yesu tyah ò *tò sáhpúle n kwò ne, *Névi Pi-á yíne à de yèvyáhrì sokò náhnáh. Yèwàhnì, ànê *sárká wìlkìpu yõtám ògbò, ànê *Liyel ògbò wèkì kwópú-á kí à yahle, té kí à ko n mo n pi. Té, sèpìn tõ-ò sóle, wáh kí yuku.

³² Wáh kéne wey yo dal mo pè syah sè, Pyeri me à ye kèkì, à kyì tyah lékàhle òne n kò.

³³ Képah sokò, Yesu ò yah vi ò tò sáhpú yah, té lékàhle Pyeri kò, té yo ò tyí: «To í tnô, *sétàn yõtè! A fòkò sònò náh me núkúle Liyel tyíle. Névye tyí kò ye áwò n sò.»

Yesu sò tẽ dùkùle

³⁴ Képah náh, à me tówù ye pò ànê ò *tò sáhpúle, té yo pé tyí: «Névi nê-á me ké tyí ne, pé ímò sò tẽ, tẽ ò gblõy dyóyí tyi ye, à mó ò *dahni twah, à mó ímò sò tẽ.*

* **8:34** 8.34 - Dahni twáhnó n wèkì ne, á á vi sah á min kò kò tẽne Yesu tyí kòle.

³⁵ Sě ó ye: Névi nê-á ne, páh pé minne n pwah n mo, à ki tekı ké soko. Té névi nê-á tekı ñ min soko ñmo ànê ñivìni wey sán yinne, ñmo min ki pwah.

³⁶ Kè ki tir nê peki névi tyí, wàh kèkōyó yí pól we, té ki n tekı n pi tyé-ńkē min soko?

³⁷ Kwáh nê tē me névi ki fē kō, ki ñ min dwe syi sah?

³⁸ Kwey gbí névyele, Liyel dël ànê tyípèl pípú ye péle. Nte, névi nê-á sen ku ñmo tyí, ànê ñ wey tyí yónóle pépi wró, *Névi Pi to ki sen ku tē yah, wàh só nēne po ñ sú gblò soko, ànê *yinyō tēntōbele.»

9

¹ Té tō ñ syı yo pé tyí: «Mé kéle n yo n dal n mo yé tyí kègbı yō: Yépi nónó-á ásô, yé tuku náh n ku n pi, té ki *Liyel tōrí we yīne, póntenole. Kè ki n pi tēnweno ñgbēne.»

Yesu vīnmōno dukùle

² Sèpīn kénúkò-ò sókóntenō náh, Yesu me Pyeri ànê Nsyaki ànê Nsyō tē, à yuku péle yōli ñgbē yó yō. Pépi ó ye sò pé yahle nénpó soko. Té, ñ dukù me vi mo pé yah soko.

³ N flo piki, à n tē pépér. Ké névi náh me kèkōyó ki fē kwáh yó ńtē piki n pi sēntēne.

⁴ Képah soko, *Yeli ànê *Moyisi wil pé yah, me n yāh ànê Yesule.

⁵ Képah tēne, Pyeri me yo Yesu tyí ne, kwó-ò dí, kǎh yīne pé tē ásô. Páh ki yèpyeno tōnó pi

ásô, núkúle ñmɔ tyíle, núkúle Moyisi tyíle, núkú mó pi Yeli tyíle.

⁶ Pyeri náh sò pĩ, wǎh nê yo n pi, kèpah ye. Tíki sò ñmɔ ànê ñ kópú nêpĩ ními kah tẽ.

⁷ Pǎh me kèpah sɔkɔ, nýírkĩ yó pɔ fob mɔ pé yõ. Kéne nýírkĩ sɔkɔ, yínpɔ yó n wil pé n nohnɩ ne: «Ñmɔ nê-á yò, ñmɔ nìdè Pídí ye ñne. Yé ne n nohnɩ ñ tyí!»

⁸ Kéne ní yõ, *tò sáhpú-á yah kɔ pé gbòplo sɔkɔ, pé náh tɔ névi wɛ. Yesu núkúní ó sò wũ ànê péle.

⁹ Pǎh me yõlɩle n tiki gbí nêne, Yesu pé sni ne, pǎh tir nê wɛ, pé káh kè yǎh névyè syah, kè pɔ nɔ *Névi Pi yúkúnwĩlnó tyí lékyî wró.

¹⁰ Pè me snínó mè tẽ yĩn, té mó tɔ me wẽne n piki n yah ne, kú se à n ye lékyî wró yúkúnwĩlnóle ni?

¹¹ Kèpah tẽne, pé tyah ñne n piki n yah ne, kú se pi, té *Liyel ñgbò wěkì kwópú ne, Yeli ñgbò-á yĩne à pɔ?

¹² Á yo pé tyí: «Yeli ñgbò ye yĩne à pɔ tyi pól tɔ sah. Nte, kú pi kè wǎrkɩ sah *Liyel wey sébě́nó sɔkɔ ne, Névi Pi-á kɩ yèvyǎhrɩ pi náhnáh, té pé kɩ ñne n yilɔ ni?»

¹³ Nte, mé kéle n yo n dal n mɔ yé tyí ne, Yeli-á pɔ tɛ. Té, névyè-á à pi pé dyɔ dyɔ tẽne. Sẽ ye sò kéle wǎrkínsàhnóle Liyel wey sébě́nó sɔkɔ ñ tyí yõ.»

Yesu sétõ yĩni wilki wẽnpir yó sɔkɔ

14 Képah sɔkɔ, pãh yĩni tẽ *tò sáhpú téló tnô, pè tówú ñgbẽ yó wε, pè mε pè kore vi, té *Liyel ñgbò wěkì kwópú mε yékâble n pɪ tò sáhpú nópilε.

15 Névyε-á núkú Yesu wε gbí nêne, kè pɪ pé tyí gběndùnñε. Pè to kyɪ wεkɪ ñ tyí.

16 Yesu mε ñ tò sáhpú piki yah nε, kwâh nê yékâb se pè n pɪ péle nɪ?

17 Nte, dí yó sò mε tówú sɔkɔ, ñmɔ yo ñ tyí nε, kwó-ò dí, páh pɔ pé pídíne ñ tyí. *Sétõ yó-á mε ñ sɔkɔ, mε à pɪ kèdòkìle.

18 Kě ñne n kwel n min n kǒ tãntàn pól sɔkɔ sétáh. Gbèfòkòpíkínì n nε n wil ñ vyãh, té ă ñ yínile n tah, ànê ñ wil n kɔkɔ. Képah-á, pé pɔ ñne ñ tò sáhpú tyí nε, pè sétõ mè yĩni wilki ñ sɔkɔ, té pè nãh tẽ wε.

19 Képah tẽne, Yesu mε yo pé tyí nε, Liyel yõ sě-ńkě névyε, pé se kɪ tẽ péle pópó, kɪ pɔ syɪ gbí nê tyí nɪ? Pé se kɪ pè so sah, kɪ pɔ syɪ gbí nê tyí nɪ? Nkě, pè pɔ ñne pé kǒ.

20 Pè mó pɔ ñne à kǒ. Sétõ-á fyò Yesu wε, à piri yike kègbule, à syɪkɪ sétáh, à n pil n kǒ gbèfòkòpíkínìne ñ vyãh.

21 Képah sɔkɔ, Yesu mε piri sú piki yah nε, gbí nε se kè tyah ñ tyí nɪ? Á mε yo ñ tyí nε, ñ wěnpir gbí dùkù-á.

22 Kèyahle, sétõ-á ńkěne à tɔkɔ n min n dah n mɔ nyàh, képah nãh pɪ, ni sɔkɔ, ñ kò-ñsahle n yah n kǒ. Nte, wàh kɪ fě n tẽ n pɪ, à pé yãm yah,

à mó pé yohni mɔ.

²³ Képah sɔkɔ, à me yo dí mè tyí: «Máh kɪ fě n tẽ n pi wò...! Tyi pól kɪ fě pi Liyel yõ sě-ò tyí.»

²⁴ Nénpó swɔ, piri sú gbo mɔ ne: «Mé sě ké yõ, té kè me tah í tyí. N yohni mɔ ké sɔkɔ.»

²⁵ Képah sɔkɔ, Yesu-á névye we, pè n to n tuke pé yõ sě, à dírí kǒ *sétõ mè yõ, té yo n tyí ne, ñmɔ nê-á névile n pi kèdòkì ànê níkitũne, à wil piri mè sɔkɔ! Té à káh tǒ de yah n sɔkɔ!

²⁶ Wǎh yo sě, sétõ me gbo mɔ, té piri yike kègbule, té mó wil n sɔkɔ. Piri núkú pi tẽ kúnó sǒ, fǒó névye náhnáh n yo ne, wǎh ku.

²⁷ Nte, Yesu me à tẽ n gbǒ tyí, à yilki sah. Piri yuku yĩn.

²⁸ Yesu-á de wòkò gbí nêne, ñmɔ ànê n tǒ sǎhpú ye sǒ wũ pé yahle, té pè me à piki yah ne, kú se pi, té pépi náh tẽ we sétõ mè yĩni wilki piri sɔkɔ ni?

²⁹ A me yo pé tyí: «Nírí ó sɔkɔ ye kéne sétǎn dùkù kɪ fě yĩni.»

Yesu tǒ n kúnó ànê n yúkúnó tyí yo

³⁰ Pǎh yal nénpó, pè me Kalile kwlole n kah, té Yesu náh sǒ me ké tyí ne, pè pé mé-ńsah pĩ.

³¹ Tir yó náh, à sǒ me n *tǒ sǎhpúle n kwɔ, té me n yo pé tyí: «*Névi Pi kɪ n dahbɪ n pi névye gbǒ. Pè kɪ à ko mɔ, té sèpǐn tǒ-ò sǒle, à kɪ yuku.»

³² Nte, n tǒ sǎhpú náh sǒ me wey mè tyí yah we, té tíkí sǒ me pè tẽ n píkinyahnole.

Nê tẽ kal?

33 Képah náh, pè yīni tē Kapernayim kwil soko. Páh me wòkò soko gbí nêne, Yesu n *tò sáhpú piki yah ne tir nê yékâb se sò pè n pi wěkì yah ni?

34 Nte, pè náh tir we yo. Tir yó náh, pè sò me yékâble n pi wěkì yah ne, pé pĩ pépi wró nê tē-á kal.

35 Képah soko, Yesu kō tē, té n tò sáhpú népĩ gbōnimí ye, té yo pé tyí: «Nê-à me ké tyí ne, pé pi yah yétēne, ñmō yīne à pi pé no náhtūne, à mó pi tōnpile pé tyí.»

36 Képah tēne, à wēnpir yó tē pō pé nyó. Té à tē kōhli n ni yō, té yo n tò sáhpú tyí:

37 «Névi nê-à wēnpir mē kénkō tēnó plé ñmō yīn yō, ñmō ye tē tē plé. Névi nê to-à ñmō tēnó plé, ñmō ó náh tē tē plé: Nte nê-á tekì mō ñmōle, ñmō ye à tē plé.»

A sépe náh nêne, á pèpey ne ye ñne

38 Képah soko, Nsyō me yo Yesu tyí ne, pé kwó-ò dí, pépi-á dí yó we, à me *sétanne n yīni n wilki n yīn yō. Té, à náh sò me pépile. Képah-á pé kō, pé ne pé à yīni mō ké pínóle.

39 Yesu me yo pé tyí: «Yé káh à yīni mō. Névi náh fē gbil pi n pi ñmō yīn yō, té kù tō ñmō yīnne n yikì nēnpó swō.

40 Tir yó náh, á sépe náh nêne, á pèpey ne ye ñne.

41 Kègbi yō, mé kéle n yo yé tyí: Yáh pi *Krista tyíle, névi nê-à ni ñgbíyīne yé kō yé wō képah yīnne, ké pèpōri kù dyah óle à dyah.

Tyi nónó-á yo gblǒy tǔnó tyí sɔkɔ

42 Wěnpǐ nónó-á sě n̄mɔ yǒ, névi nê-à pé sɔkɔ nɛ yó yǒ ykɪ dah mɔ tyípêl sɔkɔ, kè kɪ sò fónfó pè dáh-̀ngbě toh tǔ yègbɪ sɔkɔ, pè kyɪ min dah mɔ yónfí ngbě sɔkɔ.

43 Á gbò-à n dah n mɔ ále tyípékè sɔkɔ, kè kām n milki, ò té n kyɪ n de gbò núkúle tyé-̀nkě min sɔkɔ. Kèpah kɪ fónfó kal á gbàn níni kyíndenɔle ní-̀nkě nyàhnpèkè sɔkɔ. [

44 Nénpó sɔkɔ, kèfyǒ nónó-á wille n yǒ, sè náh n ku, ànê ké nyàhnpèkè náh n ni.]

45 Á gbáhkì-à n dah n mɔ ále tyípékè sɔkɔ, kè kām n milki, ò té n kyɪ n de gbáhkì núkúle tyé-̀nkě min sɔkɔ. Kèpah kɪ fónfó kal á gbyêh níni mínndahn̄mɔnɔle nyàhnpèkè sɔkɔ. [

46 Nénpó sɔkɔ, kèfyǒ nónó-á wille n yǒ, sè náh n ku, ànê ké nyàhnpèkè náh n ni.]

47 Á yí-à n dah n mɔ ále tyípékè sɔkɔ, kè wilki n milki, ò té n kyɪ n de yí núkúle *Liyel yòtǒrí sɔkɔ. Kèpah kɪ fónfó kal á mínndahn̄mɔnɔ yǒ yí níni n̄le nyàhnpèkè sɔkɔ.

48 Nénpó sɔkɔ, kèfyǒ nónó-á wille n yǒ, sè náh n ku, ànê ké nyàhnpèkè náh n ni.

49 Kèpah ye, no pól kɪ tǔ sah nyàhle, sǔ-á pne n pɪ kéle.

50 Pnɛnɛ, kwâh pèpɛy ye kéle. Té ké syínsyí-à wil ké sɔkɔ, sǔ mɛ yé kɪ tǔ fě pɪ kéle, té kè kɪ tǔ nɔ? Yé pne mɔ yé gblǒy sɔkɔ, yé tǔ wě tyí yèvɪnɪ sɔkɔ.»

10

Yesu-á kwónó nê kǒ fúr yíkínó tyí soko

¹ Yesu-á yal nénpó, à kyɪ Yude sétáh yǒ, té yuku Yurdě yónkahnɪne. Képah soko, tówû ñgbě yó tǒ tuke mɔ ñ tnô. A me tyah péle n kwo ñgbò tyí kǒle.

² Képah tǝne, *Farisiyǝno yísyó no de ñ tnô ne, pé kyɪ ñ sǒ mɔ yah. Té ñne n piki n yah ne, ké wǝkì se me dí tyí kɪ ñ kyɪ fin mɔ nɪ?

³ A me yo pé tyí ne, tir nê se sǒ *Moyisi yo sah pé tyí nɪ?

⁴ Pè me ne nǝkǝ, Moyisi-á ké wǝkì kǒ ne, wâh á kyɪle n fin mɔ, á ñ fínnmɔno tàrfyò sébǝ pɪ à kǒ. A mó à fin mɔ.

⁵ Képah tǝ soko, Yesu yo pé tyí: «Yépi kùkùtáhkì yǐn ye, Moyisi me ké wǝkìle yé kǒ sǝ.

⁶ Nte, kèkǝyó mɔ gbíne, dí ànê sê ye Liyel mɔ.

⁷ Képah ye, dí kɪ ñ sú ànê ñ yú sah, té kɪ kyɪ yégbékè kwrɔ mɔ ànê ñ kyɪle,

⁸ té pé ními kɪ pɪ núkúle. Képah soko, pè nâh tǒ n pɪ n pi nímine, pè kɪ pɪ núkúle.

⁹ Kǎh pɪ sǝ, Liyel-á nê kwrɔ mɔ, névi káh kè gbekɪ.»

¹⁰ Pǎh de wòkò, ñ *tǒ sǎhpú tǒ à piki yah wey mè yǒle.

¹¹ A me yo pé tyí: «Dí-à ñ kyɪ fin mɔ, té tǒ sê yó tǔkɔ, à tyípékè pɪ ñ kyɪ gben tǝ tyí fǒfíkì soko.

¹² Sǝ ó ye tǒ, sê-à ñ pe yahle, té kyɪ de dí yó tyí, à tyípékè pɪ fǒfíkì soko ñ pe gben tǝ tyí.»

Yesu sãm mo wẽnpì sɔkɔ

13 Képah tẽne, névye pɔ wẽnpìle Yesu tyí ne, à ò gbàn sah pé yõ. Té ò *tò sáhpú me tyah díríle n kò pé yõ.

14 Wãh képah we sɛ, à yo ò tò sáhpú tyí fòkònyàhnì sɔkɔ ne: «Yé ye wẽnpì kò, pè ne n pɔ n pɔ nmo tyí. Yé káh pé yahle n kò. Nónó dùkù-á me kéne wẽnpì sɔ, *Liyel yõtòríle pépi tyí ye.

15 Mé kéle n yo yé tyí kègbi yõ: Névi nê-à *Liyel tórí fẽ syi òkẽne wẽnpir sɔ, à náh kè we n de n pi pólle.»

16 Képah sɔkɔ, à wẽnpì tẽ, té ò gbàn sah pé yõ, à sãm mo pé sɔkɔ.

Tàhdí yó pɔ Yesu tyí

17 Képah náh, Yesu-á n yuku wěkì yah, dí yó to pɔ gbètukunɔ di ò yah, té à piki yah ne, kwó-ò pèpɛy, pé se ki pi sɔ, té ki tyé-òkẽ min we ni?

18 Yesu me yo ò tyí: «Sɔ me, té á ní ye pèpɛyne? Ne pèpɛy yó òtẽ náh me. Liyel ó ye pèpɛyne.

19 Á Liyel tyi kònsàhnó pi kè, nê-á n yo ne, káh nékókè mo, káh fòfíkì pi, káh yĩbe yĩ, káh mìnì sah á ní-ò yõ, káh ne n syki ne yõ, á sú ànê á yúne n tẽ ple.»*

20 Wãh yo sɛ, dí me à syah ne, kwó-ò dí, páh me sépinó pólle n pi pé wẽnpir gbí dùkùle.

* **10:19** 10.19 - Yah n te Ekisode 20.12-16 sɔkɔ.

21 Képah sɔkɔ, Yesu me à yah tyínɔnɔ sɔkɔ, té yo n tyí ne, tyínúkú-á yah kwɔ n tyí: A kyi n gbàn yi pól yām, à mó sé pó dibi yāmtām kō. Képah sɔkɔ, wāh ki yīnyō tahrɔ we, à mó pɔ pé sò tē.

22 Té, dí mè-á képah noh sē, n yah yiki. A sɔkɔ yèkwɔrɔ sɔkɔ. Tahrɔ ngbē sò me n tyí, képah ye.

23 Kāh pi sē, Yesu n gbòplɔ yah kore vi, té yo n *tò sáhpú tyí: «Tahbi dénóle *Liyel tǒrí sɔkɔ, kè me tah dé!»

24 Kéne wey n tò sáhpú gbàn du kègbile. Nte, Yesu tǒ n syi yo pé tyí: «N wēnpì, Liyel tǒrí sɔkɔ dénó me tah náhnáh.

25 Yāhmíkì dénwīlnóle sèndi pwāh sɔkɔ, képah ki fāhfāh kal, tãh dénóle Liyel tǒrí sɔkɔ.»

26 Képah tē sɔkɔ, pé gbàn kah du. Pè wēne n piki n yah pé tyí tyile ne, nte, nê wɔ se ki mó pwah ni?

27 Yesu me pé yah, té yo pé tyí: «Névi tē tyí, kè nãh fē n pi n pi, té Liyel wɔ tyí, kè ki fē pi. Nmɔ tē we tyi pól tyí.»

28 Képah sɔkɔ, Pyeri yo n tyí ne, nte, pépi-á tyi pól sah n̄mɔ sò tē yīnne.

29 Yesu me ne: «Kègbi yō, mé kéle n yo n dal mɔ yé tyí ne, névi nê-à fē syi, n kéte, ànê n yúpyé, ànê n yú, ànê n sú, ànê n wēnpì, ànê n swēy sah n̄mɔ yīnne, ànê n̄v̄n̄n̄ wey sãn yīnne,

30 tē ki sēnknɔnɔ lèkwékwé we kèkōyó mè sɔkɔ. A ki kètlo, ànê yúpyé, ànê yúbí, ànê

wěnpì, ànê swěy wε. A kɪ fóhnó tɔ wε, té kɪ tyé-ńkĕ min wε ńsô kèkôyó sán sɔkɔ.

³¹ Nónó-á me núkúnúkú ne gbrole, pé náhnáh kɪ pɔ n pɪ n pi ne télóle. Té nónó-á me núkúnúkú ne télóle, pé náhnáh kɪ pɔ n pɪ n pi ne gbrole.»

Yesu tǔ ò kúnó ànê ò yúkúnó tyí yo ke tǔ-òle

³² Yesu ànê ò *tǔ sáhpú sò me wěkì tē n dɔkɔ n yuku Yerusalemɪ sɔkɔ. A sò me n kɔ ò tǔ sáhpú yahle. Légbíne, pé fɔkɔ me fĕkìnóle. Té nónó tɔ-á me ò sò tē, tíkí sò me pè tē. Képah sɔkɔ, à ò tǔ sáhpú népî gbõnimí ye kĕkɪ pé yahle, à kyɪ tir nê-á kɪ à yīni n tē n pi, ké yah yo pè syah.

³³ A ne: «Yé yah, á wε dɔkɔ n yuku Yerusalemɪ sɔkɔ yò. *Névi Pi kɪ dahbɪ *sárká wĭlkɪpu yòtām ògbnɔ, ànê *Liyel ògbò wěkì kwópú gbò. Pè kɪ à mɔ kũ kǔ, té kɪ à dahbɪ Liyel yò sĕ-ńkĕpú gbò.

³⁴ Pépi kɪ kóle òne n kɔ, té kɪ n sĭn n mɔ ò yò. Pè kɪ à ko yèfòhle, té kɪ à ko mɔ. Té, ké sèpĭn tǔ-ò sóle, à kɪ yuku.»

Nsyaki ànê Nsyǔ-á nê ni

³⁵ Nsyaki ànê Nsyǔne, Sebede wěnpìle, pè nɔ de Yesu tnô, té yo ò tyí ne, kwó-ò dí, tir nê-á pé pɔ ní-ńsah ò tyí, páh me ké tyí ne, à kè pɪ pé tyí.

³⁶ A me pè piki yah ne, tir nê se pè ne, pé pɪ pé tyí nɪ?

37 Pè mó yo òn tyí ne, wàh kyɪ yīni tē òn yòtōrí tyah soko, à ye pépi soko ne núkú tē òn gbòyò sò, ní-ò mó tē òn gběyìnè sò.

38 Képah soko, à yo pé tyí: «Kwâh nê-á yé n ni, yé náh kè pī. Yé se kɪ fě wɔ n wɔ wɔ wóh soko, kɪ de wíl yèvyãhrɪ soko n tyí kǒle?»

39 Pè me à syah ne, páh kɪ tē we. A me yo pé tyí: «Gbɪ ye, yé kɪ n wɔ n pi n wɔ wɔ wóh tē wɔ soko, té kɪ n de n wíl n pi yèvyãhrɪ soko n tyí kǒle.

40 Nte, névi nê-á n tē n pi n gbòyò ànê n gběyìnè sò, képah náh n wíl n pi n mɔ tyí. Kéne tē-ntàn kɪ pɔ névyé kǒ n pi, Liyel-á sè tǒ sah nóno yinne.»

41 *Tò sáhpú népí gbām téló-á képah noh sē, pé foko vyãh Nsyaku ànê Nsyõne.

42 Képah soko, Yesu me pé pól ye, té yo pé tyí: «Yé pī ne, sétáh mē yō kwlo yòtām-á pé kwil tãne n tē n sah pé dyo dyo tēne, té kwil né-ngbnɔ n mó pé tãhkìle n sah névyé yō.

43 Nte, yépi tyí náh n pi n pi sē. Gběntē náhle, yépi soko nê-à me ké tyí ne, pé pi yòtēne, tē òn gblǒy pi yé tǒnpile.

44 Té, yépi soko nê-à me kɪ tyí ne, pé yòtōrí yah n kǒ, tē òn gblǒy pi yé pól yǒle.

45 Tir yó náh, *Névi Pi náh pɔ ne, névyé tǒle n pi péwɔ tyí. Nmɔ ye pɔ tò pi yinne névyé tyí, té kɪ òn min kǒ névyé náhnáh yō dwe yinne.»

Yesu yítú dí Bartime yí yíkí mɔ

⁴⁶ Képah náh, pè yīni tē Yeriko kwil. Yesu, ànê n *tò sáhpú, ànê tówû ñgbě-á n wil kwil soko gbí nêne, yítú dí yó sò me tēnóle wěgbali soko, me n ni n syi. Time pídí ye sò ñne, pè n ye Bartimele.

⁴⁷ Wáh noh ne, Nasareti Yesu-á n soko, à tyah n de n syi ne, Yesu, *Davidi pídí, à pé yām yah.

⁴⁸ Képah soko, náhnáh sò me ñ vyāhle n tū. Nte, à tō n kah n de n syi ne, Davidi pídí, à pé yām yah.

⁴⁹ Képah tēne, Yesu yīn, té ne, pè à ye yah. Pè me yítú dí ye yah, té yo ñ tyí ne, à ñ ni vi, à mó yuku, wáh me ñne n ye.

⁵⁰ Dí-á képah tē noh, à ñ fwòmò-ñgbě milki, té yoko syiki ñ gbyêh yō, à yuku Yesule n yīki.

⁵¹ Yesu me à piki yah: «Kû me á ne, mé pi á tyí?» Yítú dí me yo ñ tyí ne, kwó-ò dí, à kè pi, pé tō ne n yah.

⁵² Á me yo ñ tyí: «Ne n yuku, nímō yō sēnó ye ñ de mō.» Nénpó swō, ñ yí yiki mō, à me Yesu sò tē.

11

Yesu de òkùle Yerusalem

¹ Páh de n te Yerusalemne, pè sò me yúkey Betefase ànê Betani kwille, Wólívyê sésán yōli tnô. Képah soko, Yesu ñ *tò sáhpú soko népí ními wilki tō,

² té me yo pé tyí ne, pè kyi kwil nê-á pé yahle. Páh ki kyi yīni tē nénpó, páh ki nkwěndyípirí

yó wε tóhnmɔnsàhnóle, névi náh dɔkɔ yah nê yõ. Pè à de pɔ.

³ Té, névi-à kɪ pè piki yah nε, sɔ se, té pè ñne n de nɪ, pè yo ñ tyí nε, ñ yétô-á me Tě-ñgbě dí tyí. Té wǎh kɪ ñ syɪ à tekɪ mɔ núkúnúkú ásô.

⁴ Képah sɔkɔ, pè mó sɔkɔ, à kyɪ ñkwěndyípirí mè wε tóhnmɔnsàhnóle kégbó, gbô yó yah, wěkì gbòpɔ. Pè me à de.

⁵ Nónó-á sò me nénpó, pé tókù pè piki yah nε, kú se pɪ, té pè ñkwěndyípirí mène n de nɪ?

⁶ Képah sɔkɔ, Yesu-á sò pè tǔ sɔ, pè képah yo no tyí. No ye pè kǔ, pè à de sɔkɔ.

⁷ Pè me pɔ ñkwěndyípirí mène Yesu tyí. Té pé flo mɔ ñ yõ, Yesu kǔ à dɔkɔ.

⁸ Névyε náhnháh mó pé flo mɔ wěkì yõ. Tókù mó fòkòni kǔlɪ kyěh sɔkɔ, à n mɔ n yuku wěkì yõ sɔkɔ.

⁹ Pǎh n yuku, nónó-á sò me n kɔ Yesu yahle, ànê nónó-á me ñ sò tě, pè sò me n gbo n mɔ, me yo tũ nε: «Wosanna, Tě-ñgbě Liyel yĩn pɪ gbò! Nê-á n pi ñ yĩn yõ, Liyel sǎm mɔ ñ sɔkɔ!

¹⁰ Á sútó *Davidi tǔrí nê-á n pi, Liyel sǎm mɔ ké sɔkɔ! Wosanna, Liyel yĩn pɪ gbò yĩnyõ sɔkɔ.»

¹¹ Yesu-á de Yerusalemɪ sɔkɔ sě, à kyɪ de *Liyel wòkò ñgbě kéntáhkì sɔkɔ. A kè yah kore vi, té ñ syɪ wil. Képah náh, tyah-á pɔ n piri, à sɔkɔ ànê ñ tò sáhpú népî gbõnimíne Betani kwil sɔkɔ.

Yesu léplɔ ye mɔ sènsóké yó yõ

12 Ké dendalle, pãh n wil Betani soko gbí nêne, kwëki Yesu tẽ.

13 Képah soko, à me sènsóké yó we fíi mîle gbòp ké tyí. À me no de yah, pye-à ki n we n pi ké tyí. Nte, wãh yĩni tẽ ké tnô, à kyi kè we mĩri óle. Ké pye pi gbí nãh sò no, képah ye.

14 Képah tẽne, Yesu yo sènsóké mè tyí ne, ne nãh tõ ké pye yõ n yah n pi pólle. Nte, n *tò sãhpú mó kè noh.

Yesule Liyel wòkò ñgbẽ kéntáhkì soko

15 Képah nãh, pè yĩni tẽ Yerusalemi. Yesu me de *Liyel wòkò ñgbẽ kéntáhkì soko, à tyah yí yãmpu ànê dwépúle n yĩni n wilki. Té pò tũpu tàbálnó tu wilki mo, ànê *sárká kèpye yãmpu klõle.

16 Té, à nãh fẽ syi vyó nétẽ yó ntẽ kõ, à de kah Liyel wòkò ñgbẽ kéntáhkì soko.

17 Té tyah péle n kwò, me n yo pé tyí: «Kè nãh me wárkínsàhnóle ne, <nímò Liyel wòkò ki n ye kèkõyó kwlo kwlo pól névye níri pí-nsahle> di? Té, yépi me pò kè pi névye yõ vĩnsyikipu tẽ-nsahle.»*

18 Képah tẽne, *sárká wĩkĩpu yõtãm ñgbno ànê *Liyel ñgbò wẽkì kwópú-á kè noh sã, pè tyah Yesu kònmo-nsahle n yah n kõ. Té, n tíkí sò me pè tẽ, tir yó nãh, n kwónó tyí sò me no tówú tyí.

* 11:17 11.17 - Yah n te Yesayi 56.7 soko.

19 Képah sɔkɔ, gbíyí-á de, Yesu ànê n *tò sáhpú wil kwil sɔkɔ.

Sènsóké sésuwô kókónóle

20 Ké dendal séngbǒle, pǎh pɔ n sɔkɔ, pè sènsóké mè we kókónóle, à pɔ syi ké yǎhni tyí.

21 Pyeri dyó-á to kǒ kéle, à yo Yesu tyí ne, kwó-ò dí, wǎh sǒ léplɔ ye mɔ sènsóké nê yǒ, à yah, ké pól-á kɔkɔ.

22 Képah sɔkɔ, Yesu yo pé tyí ne: «Yé sǎ Liyel yǒ.

23 Kègbi yǒ, mé kéle n yo yé tyí: Névi kɪ fě yo yǒli ñgbě mè tyí ne, kè yuku yal ásô, kè kyɪ n sykɪ n de pne yɔ sɔkɔ. Tě-à me n sǒ ñkēne tòtò ñ ni sɔkɔ, té me sǎ yíí ké yǒ ne, pǎh nēne n yo, kǎh kɪ pɪ, kè kɪ mó ñtyínɔ pɪ sǎ ñ tyí.

24 Képah ye, mé kéle n yo yé tyí: Yáh kwáhdúkú nēne n yah n kǒ Liyel tyí níri sɔkɔ, yé sǎ ké yǒ ne, yáh ké we te. Kè kɪ ñtyínɔ yé kǒ.

25 Anê tǒ, wáh yuku yín n tyah níri pínóle, té á ní-ò-à me pɪ de á tyí, kè yǒ mɔ à kǒ. Képah-à pɪ, yé sú Liyel nê-á yínyǒ, à kɪ yépi tɔ tyípêl yǒ mɔ yé kǒ. [

26 Nte, yépi-à névyé tyípêlle n yǒ n mɔ péle n kǒ ñkēne, yé sú Liyel nǎh yépi tɔ tyí yǒ n mɔ yé kǒ n pi.]»

Nê wěkìle Yesu kǒ, à tyi nópile n pɪ

27 Yesu ànê n *tò sáhpú-á pé syi kyɪ Yerusalemɪ sɔkɔ, wǎh me n kɔ *Liyel wòkò ñgbě kéntáhkì sɔkɔ gbí nēne, *sárcá wìlkɪpu yǒtǎm

̀ngbno, ànê *Liyel ̀ngbò wě̀kì kwópu, ànê yewàhni pɔ̀ n̄ tyí.

²⁸ Té me à piki yah ne, nê yĩn yõ se à n pi tyi nópile ni? Nê se à kõ ké wě̀kìle ni?

²⁹ À me yo pé tyí: «Mé ki tir núkú óle yé piki yah. Yáh ki ké yah yo ní tyí, nê yĩn yõ-á mé n pi tyi nópile, mé ki kè yo yé syah.

³⁰ Yépi tẽ tyí, nê tekɪ mo Nsyõne, à pɔ̀ névyele n *wel n wilki? Liyel se, tĩ névye se? Yé yo ní syah.»

³¹ Képah sokɔ̀, pè tyah n yo wě̀ tyí ne, páh ki ne, Liyel-á tekɪ mo ñne, wáh ki ne, té kú se pi, té pé náh sã̀ n̄ yõ ni?

³² Pé náh se mó tõ fẽ n yo n pi ne, névye-á tõ ñne... Pè sò me tówû tíkile n pi, képah ye. No pól sò me n sõ ne, Nsyõne, *Liyel tẽntõ syinyo-ò kègbɪ-á sò ñne.

³³ Képah sokɔ̀, pè Yesu syah ne, pé náh pĩ. N to mó yo pé tyí ne, nê yĩn yõ-á pé tyi nópile n pi, péwɔ̀ to náh mó kè yo pè syah n pi.

12

Divě sésân swāh tǔpú népêl sèmirkìle

¹ Képah náh, Yesu tyah n yāh pé tyí sèmĩrn sokɔ̀ ne níkẽ: «Dĩ yó ye lésõ divě sésân sõ, té kěki mo kè kore vi. Té kyɪ tédáhkì yó yõ swɔ̀ yó tũ, divě sésân pye yíkí-nsahle. Té me duke syíkípu tẽ-ñsah mo. Képah náh, à swāh tǔpú tokɔ̀, à pɔ̀ swāh mè dahbi pé gbõ, té pyẽ sokɔ̀ kóló.

² Sé pye gbε gbí-á pɔ nɔ, à ò tònpi yó tekɪ mɔ ðivě sésân swāh tǒpú nópi tyí nε, pè pé tyí ðivě sésân pyele à kǒ, à pɔ pé kǒ.

³ Képah tēne, ðivě sésân swāh tǒpú nópi tēntò dí tē ko, té à fin mɔ, à sɔkɔ ò gbò kókóle.

⁴ Swāh nétē tǒ tònpi yó tǒ. Pé tǒ kyɪ òmɔ to ko, té à mɪkɪ ò yǒ sɔkɔ, té òne n gbyo.

⁵ Swāh nétē tǒ ò syɪ ònî yó tekɪ mɔ n tǒ. Nmɔle, pè òmɔ ko mɔ, té sēnkǒ pɪ pé náhnáh tyí: Pè pé tókù ko, té pé tókù ko mɔ.

⁶ Ne núkú nê-á sǒ wũ sètē dí tnô, òmɔle, ò nìdè Pídí ye. A òmɔ tekɪ mɔ pé tyí tēyne, té me n sǒ nε, pǎh kɪ pé pɪ wɔ yah sen ku.

⁷ Nte, swāh tǒpú nópi-á à wε, pè tyah n yo wě tyí nε, pè yah, ò gběyǒpi-á n pɪ yò. Pè pɔ, pé à ko mɔ. Gbēkɪ mó pɪ pépi tyíle.

⁸ Té dí pídí tē ko mɔ, té à tɔkɔ kyɪ milki ðivě sésân swāh kahnune.»

⁹ Képah sɔkɔ, Yesu pè piki yah: «Sǒ me ðivě sésân swāh nétē kɪ pɔ n pɪ n pi? A náh pɔ ðivě sésân swāh tǒpú nópi pól ko mɔ, té kè dahbɪ n pɪ nósýó gbò di?

¹⁰ Yé náh kè kar yah *Liyel wey sébē sɔkɔ di? Kè me wárkínsàhnóle nε: <Wòkò mópú-á dáhkì nê yahle, képah pɔ pɪ dáhgbíle, wòkò dáhgbenne.

¹¹ Képah n wil Tē-ògbē tyí.

Té ápi tyí, gbēndùñ tìr ye kéle!»*

* **12:11** 12.10 ànê 11 - Yah n te Yìgbìnì 118.22 ànê 23 sɔkɔ.

12 Képah sɔkɔ, *Nsyifunɔ yòtãm tyah Yesu tẽ-ńsahle n yah n kɔ̃. Tir yó náh, pè sò pĩ ne, pépi yõ-á à mi sèmĩrkĩ mènɛ. Té, tówû tíkí sò me pè tẽ. Pè me ye ñ yõ, té sɔkɔ.

Wromenɔ yòtẽ ñgbẽ mórí tyíle

13 Képah náh, pè *Farisiyẽnɔ ànê *Yerɔdi náh névyɛ túkù wilki tekɩ mɔ Yesu tyí ne, pè kyɩ à mɔ yah pikínyahnɔ sɔkɔ.

14 Pè pɔ yo ñ tyí ne, pé kwó-ò dí, páh pĩ ne, gbɩ ó kókó-á ñmɔ n ne n yo. A náh tíkíle n pi névi yah. A náh névile n wah névi sɔkɔ. Wáh gbule névyɛle n kwɔ Liyel wěkì yõ. Képah-á pé kɔ̃, pé ne, pé à piki yah: Kè se yĩne pé móríle *Wromenɔ yòtẽ ñgbẽne n kɔ̃, tĩ kè náh yĩne? Pé se séle n mɔ, tĩ pé káh sè mɔ?

15 Nte, Yesu sò pĩ ne, nê-á pè n sò, képah náh pè n yo. Káh pi sě, à yo pé tyí ne, sò se pi, té pè péle n mɔ n yah ni? Pè pɔ pó mè núkúle, pé yah.

16 Pè me pó núkúle à kɔ̃. A me pè piki yah ne, nê yah se, ànê ñ yinne wárkínmɔnɔle ké yõ ni? Pè à syah ne, Wromenɔ yòtẽ ñgbẽ-á.

17 Képah tẽne, à yo pé tyí ne, pè Wromenɔ yòtẽ ñgbẽne n kɔ̃ ñ tyíle, pè mó Liyelle n kɔ̃ ñ tyíle. Képah sɔkɔ, pé gbàn du ñ wey mè dùkùle.

Sadusẽnɔ Yesu piki yah lékyî yúkúnwìlnó tyí yõ

18 Sadusẽnɔle, nósýó ye nónó-á ne, lékyî náh n yuku n wil n pi. Pé túkù pɔ Yesu tnô, té à piki yah ne íkě,

19 kwó-ò dí, *Moyisi-á Liyel tir kònsàhnó mè wǎrkɪ sah pé kǒ ne, dí nê tyí gběndí-à me, té tē ku, té n kyi sah pi kēne, n gběndí mè-á yīne à pékúsê mè tǎko. A wěnpì dubi à kǒ, nónó-á kɪ pɔ n pɪ n pi n nénkyídí náhne.†

20 Té, dínpi yísyó-á sǒ me népì kwǎrnimi pé yú tyí. Nénkyí tē-á sê tǎko, té ku, té n kyi sah pi kēne.

21 N sǒ syɪ me pékúsê mè tǎko. N tɔ pɔ ku, té à sah pi kēne. Tǒ-ò tɔ tyí pɔ pɪ sē.

22 Sěntě ó-á pɪ pé no téló pól tyí. Té népì kwǎrnimi nópi pól-á ku pi kēne. Pé kúntenɔ náh, pi mè tɔ pɔ ku.

23 Káh pɪ sē, lékyî yúkúnwìl sǒle, pàh yuku, pi mè se kɪ pɪ nê tyíle nɪ? Tir yó náh, pé népì kwǎrnimi pól-á à pī sēle.

24 Képah sǎko, Yesu yo pé tyí: «Liyel wey pí-ńkē, ànê Liyel tēnweno pí-ńkē yīn náh yéle pílkínó sǎko di?

25 Lékyî yúkúnwìl sǒle, sê tókókì náh me, pe dékè náh me. Névye kɪ me, á kɪ ne *yînyǒ tēntǒbe sǒ pal tē-ńsah.

26 A yuku lékyî yúkúnwìlnó tyí sǎko: Yé náh kè kar yah Moyisi sébē sǎko, fí nê-á dukuni tyíle n yo, nê-á sǒ nyàh lépǒle ké sǎko di? Kè me wǎrkínsàhnóle nēnpó ne, Liyel-á yo Moyisi tyí: <Nmo ye Abrahamɪ Liyelle, ànê Yisakɪ Liyelle,

† 12:19 12.19 - Yah n tɛ Deteronɔmɪ 25.5-10 sǎko.

ànê Yakɔbi Liyelle.>‡

27 Vye Liyel ye ònne, lékyî Liyel náh. Sě ye yéle kàhnpilkintěńóle yò.»§

Liyel tyi kònsàhnó sɔko nê-á gblò kal

28 Képah sɔko, *Liyel ògbò wěkì kwó-ò dí yó kéne yékáb noh. A kè we, Yesu tě we kè yo ple Sadusě nópi tyí. A me no de òn tńô, té à piki yah ne, Liyel tir kònsàhnó nê tě se kal sé pólle ni?

29 A me yo òn tyí: «Liyel tir kònsàhnó nê-á kal sé pólle, képah we yò: <Á níkì kwɔ, Yisrayel: Api Tě-ògbě Liyelle, òmɔ núkúní ó ye Tě-ògbě Liyelle.

30 N tyí yĩne kè no á tyí á ni pólle, ànê á min pólle, ànê á fɔko sɔno pólle, ànê á tǎhkì pólle.»*

31 Ké ní-ò we yò: <Á ní-ò tyí yĩne kè no á tyí á gblɔy tyí kɔle.>† Liyel tir kònsàhnó yó n̄tě náh tǔ kal sépi nínóle.»

32 Wǎh yo sě, Liyel ògbò wěkì kwó-ò dí me yo òn tyí ne, kǎh ple, pé kwó-ò dí! Tyi nónó-á à yo, gbɔ-á séle. Tě-ògběne, òmɔ núkúní ó-á Liyelle. Liyel yó náh tǔ me òmɔ tyí náh.

33 Nmɔ tyí-á yĩne kè no á tyí á ni pólle, á fɔko sɔno pólle, á tǎhkì pólle. Ànê á ní-ò tyí mó no á tyí á gblɔy tyí kɔle. Képah-á kɔ ple kal á yípě ko suke Liyel kɔ *sárkále, ànê sárká duke téló pólle.

‡ 12:26 12.26 - Yah n te Yekisɔdi 3.6 sɔko. § 12:27 12.27 - Nónó-á ku sɔko di mónóle, kǎh yo ne, Liyel-á pi pépi Liyelle, képah n wěkɔ ne, pǎh me min sɔko. Tir yó náh, Liyelle, kyí Liyel náh ònne. * 12:30 12.29 ànê 30 - Yah n te Deteronɔmɔ 6.4 ànê 5 sɔko. † 12:31 12.31 - Yah n te Levitiki 19.18 sɔko.

³⁴ Képah sɔkɔ, Yesu kè wɛ nɛ, n̄ lékám-á nɔ, à ké yah wɛ t̄sah yo. A yo n̄ tyí nɛ, à náh mɛ fíí *Liyel t̄ɔrílɛ. Képah náh, néví náh t̄s f̄ɛ syi à piki yah tir yóɛ.

Liyel nɛ tékínmɔnɔ n pi Davidi náh nɛnɛ òkù n̄nɛ?

³⁵ Yesu s̄ò mɛ névyelɛ n kwɔ *Liyel wòkò òngb̄ɛ kéntáhkì sɔkɔ, té mɛ n yo nɛ, s̄ò se pi, té *Liyel òngbò w̄ɛkì kwópú n nɛ n yo nɛ, *Kristalɛ, n̄-á Liyel nɛ, páh kɪ tekɪ mɔ, òmɔ-á kɪ pi *Davidi náh nɛnɛ ni?

³⁶ Tir yó náh, Davidi n̄t̄ɛ s̄ò kè yo *Liyel Mírki gbò ȳò nɛ, T̄ɛ-òngb̄ɛ Liyel-á kè yo péwɔ T̄ɛ-òngb̄ɛ tyí nɛ: «K̄ò t̄ɛ n̄mɔ gbòȳò s̄òlɛ, mé kɪ á s̄épébi pi á gbáhsúkíɛ.»‡

³⁷ Davidi n̄t̄ɛ-à ònɛ n ye n̄ T̄ɛ-òngb̄ɛnɛ, kè kɪ pi s̄ò, té à kɪ pɔ n pi Davidi náh nɛnɛ? Légb̄íɛ, tówú òngb̄ɛ s̄ò mɛ wɛy m̄ɛnɛ n nohnɪ Yesu tyí n̄vìn̄n̄ sɔkɔ.

Yesu nɛ, pé pé gbl̄ɔynɛ n kyɔmɪ Liyel òngbò w̄ɛkì kwópúɛ

³⁸ Wǎh mɛ névyɛ kwónó sɔkɔ gbí n̄nɛ, à yo pé tyí: «Yé yé gbl̄ɔynɛ n kyɔmɪ *Liyel òngbò w̄ɛkì kwópúɛ. Fwòmɔn òngbɔn̄ mónkɔnk̄ónɔ tyí nɔ pé tyí. Pé n nɛ mɛ ké tyí nɛ, névyɛ nɛ n t̄s n̄ sah n wɛkɪ pé tyí tówú t̄ùkè-òt̄àn sɔkɔ.

‡ 12:36 12.36 - Yah n tɛ Yìgbìn̄n̄ 110.1 sɔkɔ.

39 Pě tĕ-ntân ñgbnɔle n yah n kǒ *Liyel ní-ńtân vî sɔkɔ, ñ té né-ñgbnɔ tĕ-ntânne n yah n kǒ yǒke ñgbnɔ yǒ-ńtân sɔkɔ.

40 Nte ne n syki pékúsyɔ yǒ, pé gbǎn yīle n syi yǐnvī sɔkɔ. Nte níríle n pi yǒšǐkìle ne, névyé pé wε. Sĕ ye pé tukey ki tuke kéréké yó.»

Pékúsê yām ne yó ñvì pólé Liyel kǒ

41 Légbíne, Yesu sǒ me kǒntĕńóle Liyel wòkò yah, pó dáhnmo-ńsah kwáh gbòpɔ, té névyé pó dáhnmo dùkùle n yah. Tahbi náhnáh sǒ me pó náhnáhle n dah n mo n pɔ.

42 Dǒ, pékúsê yām ne yó pɔ, pó pló nínó dah mo. Sè sǒ me núkú núkúnɔ nínó óle.

43 Képah sɔkɔ, Yesu ñ *tò sáhpú ye, té yo pé tyí: «Kègbi yǒ, mé kéle n yo yé tyi, pékúsê yām ne mè-á pó ñê dah mo kwáh sɔkɔ, kè kal névyé pól tyíle.

44 Tir yó náh, no pól pó yǒ dòhnónó ye, pé dah mo. Nte, ñmo ànê ñ yām tóle, ñ sahki pól ye à dah mo, wǎh ne pɔ ñê tɔ yǒ n pi.»

13

Yesu Liyel wòkò ñgbĕ sónó tyí yo sah

1 Yesu-á n wil *Liyel wòkò ñgbĕ kéntáhkì sɔkɔ gbí ñêne, ñ *tò sáhpú sɔkɔ ne yó me à syah ne, kwó-ò dí, à vî ñgbnɔ nópi mo dùkù tĕne n yah, dyêh pèplɔle dé!

² Yesu me yo n̄ tyí: «Á vì ñgbno n̄opi mónó we kè! Sé pól kɪ pɔ sɛki. Dáhkì n̄úkú n̄tē n̄áh n̄ wũ n̄ pi ké ní-ò yõ.»

³ Képah n̄áh, Yesu kyɪ kō tē Wólívyê sésân yõli yõ, Liyel wòkò ñgbē yèsreynɛ. Wǎh me n̄énpó, Pyerɪ, ànê Nsyahkɪ, ànê Nsyõ, ànê Andrepi pɔ pé yahle, té à piki yah ne,

⁴ gbí n̄ê se tyi n̄opi pól kɪ n̄ pɪ n̄ pi nɪ? Nkē, à yo pé syah. Tyi n̄ónó se kɪ sé pɪ gbíne pé wēkɪ nɪ?

Yèvyāhrɪ tyah gbíne

⁵ Képah sɔkɔ, Yesu tyah n̄ yo pé tyí: «Yé yé gblõynɛ n̄ kyomɪ, ne káh yé pilki.

⁶ Névyɛ n̄áhnáh kɪ pɔ n̄mɔ ȳin tɔkɔ n̄ pi, té kɪ ne, pépi-á *Kristalɛ. Pè kɪ névyɛ n̄áhnáh pilki.

⁷ Yáh mál tyíle n̄ nohnɪ gbí n̄êne, yé gbòplo ànê fíí sɔkɔ, yé káh ye tíkí yé tē. Sépi ye ȳine sè pɪ. Nte, képah n̄áh t̄n̄n̄i kèkõyó tyénóle.

⁸ Kwil yó kɪ yuku kwil yóle n̄ fwo, yòtē yó kɪ yuku yòtē yóle n̄ fwo. Té, sétáh syahrɪ kɪ me n̄ pɪ tyahnó túkù sɔkɔ, ànê kwɛkɪle. Kè kɪ me, á kɪ ne sê kúrki tē gbí yónó s̄.

⁹ Képah ye, yépi tē wɔle, yé yé gblõynɛ n̄ kyomɪ. Tir yó n̄áh, névyɛ kɪ yéle n̄ tē n̄ kyɪ n̄ pɔ tukey t̄ukè-ñt̄àn sɔkɔ. Pè kɪ yéle n̄ ko *Liyel ní-ñt̄àn vì sɔkɔ, té kɪ yéle n̄ tē n̄ kyɪ n̄ pɔ yòtām ànê yòtām ñgbno tyí n̄mɔ ȳinne ne, yé pɪ n̄mɔ t̄arfyonóle pé yah sɔkɔ.

10 Té sépi-à pópó ne n pi, nìvìnì wey sán ñgbò yĩne ké ne me yo kɔ̀ kèkôyó kwlo kwlo pól névye tyí.

11 Nte, pàh yé tē n yuku pé gbò dáhbí-ńsah, yé káh tǒnì yé fɔ̀kɔ̀le n sɔ̀, yáh ne tyi nónó yo n pi. Tyi nónó-à de yé fɔ̀kɔ̀ légbíne, yé kɔ̀ sépi yo. Tir yó náh, tyi nónó-á yé kɔ̀ n yo n pi, sè náh n wil n pi yépi tyí, sè n wil *Liyel Mírki tyí.

12 Névye kɔ̀ pé yúpyé gbàhle n de n mɔ̀ ne, pé pé ko mɔ̀, súbí tɔ̀ kɔ̀ n pi sěntěne pé wěnpì tyí. Wěnpì tɔ̀ kɔ̀ pé dúbípúle n fwo, kɔ̀ péle n dah n mɔ̀ kú sɔ̀kɔ̀, pé ku ku tēne.

13 Névye pól kɔ̀ yé we mɔ̀ ñmɔ̀ yĩnne. Nte, névi nê-à ñ tah sah, à pɔ̀ nɔ̀ kɔ̀ tye gbí tyí, tē kɔ̀ pwáhnmonɔ̀ we.»

Yevyāhri ñgbēne

14 Képah sɔ̀kɔ̀, Yesu tǒ yǒ sɔ̀kɔ̀ ñ weyne - ñte, wey mē kàrpu yĩne pé ké dùkù pĩ. A ne: «Yé kɔ̀ yíkínó pí-ò kèpékè we fí yó, à náh sò yĩne tēnóle ñyāh sɔ̀kɔ̀. Légbíne, nónó-à me Yude, pé yĩne pé to de ymɔ̀ sɔ̀kɔ̀.

15 Névi nê-à me gběntin yō, tē-à tiki, à káh ne, páh n de kwāhle n tɔ̀kɔ̀ pé wòkò.

16 Nê-à se me swāh sɔ̀kɔ̀, à káh ne, páh pé syi n yuku fwòmò-ñgbē tókó-ńsah pé tinnē.

17 Té kēne sèpìn kɔ̀ pi tyípékèle syó kurn nētān, ànê yǒkɔ̀ nētān tyí.

18 Képah ye, yé Liyelle n ni, kè káh pi ki sɔ̀kɔ̀.

19 Tir yó náh, kéne sèpìn kɪ pi yèvyährɪ ñgběne, nê kénkõ náh wɛ yah, Liyel-á kèkõyó mɔ sɔ̃, à pɔ syɪ núkúnúkú tyí. Anê sɛnkõ náh tɔ̃ wɛ n yah n pi.

20 Nte, Liyel nítě-à me ké yáhntɔkɔ-ńkēne ne, páh kɪ wĩkínó pi kéne sèpìn sɔkɔ, ñnî yó nítě min náh náh n wil n pi ké sɔkɔ. Nte, wáh nónó yah tɔkɔ pi ñ tyíle, pépi yĩn ye à wĩkínó pi kéne sèpìn sɔkɔ.

21 Képah ye, névi-à yo yé tyí ne, yé yah, *Krista-á me ásô, képah náh pi, wáh me wró mɛ, yé káh sɛ tɛ yõ.

22 Tir yó náh, m̀nyobe tókù kɪ n wil n pi, té kɪ ne, pépi-á Kristale. Tókù kɪ mó tɔ̃ wil ne, pépi-á *Liyel tɛntò syinyopule. Pè kɪ gbĩl duke dukele n pi, kɪ n yah n kɔ̃ Liyel névyɛ yáhntɔkɔnɔ nítě pĩlkí-ńsahle, páh náh fɛ n tɛ n pi.

23 Képah ye, yépi tɛ wɔle, yé yé gblõyne n kyɔmɪ. Mé ye sé pól kwāh yo sah yé tyí.

Névi Pi pónóle

24 Kéne sèpín sɔkɔ, yèvyährɪ mɛ sókóntɛnɔ náh, gbĩ kɪ pi fɛntũne, ñwɔ̃ náh tɔ̃ n piki n pi,

25 ñwɔ̃ képye kɪ wil yĩnyõ kɪ sykɪlɪ, yĩnyõ tãhkínó kɪ yike.

26 Ké légbĩne, yé kɪ *Névi Pi wɛ, à kɪ n pi ñyĩrn wró ñ tãhkì ñgbě ànê ñ gblò sɔkɔ.

27 A kɪ *yĩnyõ tɛntòbe tɛkɪ mɔ kèkõyó yey yey pól sɔkɔ, pé kɪ ñ névyɛ yáhntɔkɔnɔ tuke mɔ, à tɔkɔ yõ mɛ tyí, á pɔ syɪ yõ mɛ tyí.

Kwónó nê-á kǎ sènsóké tyí yǎ

28 Yé kè pǐ kwónó nê-á sènsóké n kǎ: Ni-à me n kǎ ké yǐngbǎn sǎkǎ, kǎ mǐ pǐ, yé n pǐ ne, ki de gbí-á nǎ.

29 Sǎnkǎ-ó ye: Yáh tyi nópi wǎ, sè n pǐ, yé pǐ ne, *Névi Pi pónó-á de te, wǎh me yúkey.

30 Kègbǐ yǎ, mé kéle n yo yé tyí, kwey gbí névye pól nǎh n ku n te n pi, né tyi nópi pól nǎh pǐ.

31 Yǐnyǎ ànê sétáh kǐ pǎ sǎkǎ, òte nǎmǎ welo nǎh n sǎkǎ n pi pólle.

Liyel ó ye kèkǎyǎ tyé sǎle n pne

32 Té ké lésǎle ànê ké gbíne, ònǐ yó nǐtǎ nǎh kè pǐ: *Yǐnyǎ tǎntǎbe nǎh kè pǐ, Liyel Pi nǐtǎ tǎ nǎh kè pǐ. Sú núkúní ó ye kè pǐ.

33 Yé yé gblǎyne n kyǎmǐ, yé mó ne n yah. Tir yó nǎh, yé nǎh ké pǎ gbí pǐ.

34 Kè me, á kǐ ne dí yó sǎ n sǎkǎ kóló, té ò fǒ dahbǐ ò tǎntǎbe gbǎ. A pé pól ne núkú núkú wǎkǐ pé tǎnne, té yo gbô syíkí-ò tyí ne, à káh ne n dǎ, à ne n yah.

35 Képah ye pǐ yépi tǎ ne n yah, tir yó nǎh, yé nǎh gbóntǎ pǎ sǎ pǐ: Kè kǐ pǐ nǐvǐne nǐ? Kè kǐ pǐ lénle nǐ? Kè kǐ pǐ snǐ gbo gbíne nǐ? Kè kǐ pǐ séngbǎle nǐ?

36 Wǎh n pi, à káh pǎ yé wǎ tǎ dǎy sǎkǎ.

37 Nte, nê-á mé n yo yé tyí, mé kéle n yo no pól tyí: Yé ne me n yah.»

14

Nsyifunɔ yõtām me Yesu kònmo-ńsahle n yah n kɔ̃

¹ *Pakɩ syáh-á n tyah yínintẽnɔle, ké téy sò wũ sèpìn nínì, té Pakɩ ànê sě-ńkê búrn syáh kɩ n syah n pi. Légbíne, *sárká wĩlkìpu yõtām ñgbnɔ ànê *Liyel ñgbò wěkì kwópú sò me Yesu tẽ-ńsahle n yah n kɔ̃ yínvĩ sɔkɔ, ñ kònmo mo tẽnɛ.

² Pè sò me n yo wě tyí ne, pé náh fě tir mè pɩ n pi syáh syáhnó sèpìn sɔkɔ, káh kɩ fě kwil névye fòkòvyāhnì yilki mo kègbile.

Sê yó pɔ làsèkwěl mo Yesu yõ

³ Ké lésòle, Yesu sò me Betani kwil sɔkɔ, *tótě dí Simo gbô sɔkɔ. Wáh sò me yónó sɔkɔ gbí nêne, sê yó de yuku pé tnô nurɩ so pèpey yóle, làsèkwěl dan tahle ké yíine. A ké yah yɩkɩ mo, té ké kwe mo Yesu yõ.

⁴ Nónó-á sò me nénpó, kè náh sò nɔ tókù tyí. Pè yuku n yo wě tyí ne, kù se pɩ, té à làsèkwěl mè yɩkɩ sě nɩ?

⁵ Káh kɩ sò fě yām, kɩ kah pó pló kyetóní yõ, té kɩ séle yāmtām kɔ̃. Té me pé fòko vyāh pɩ mènɛ kègbile.

⁶ Nte, Yesu me yo pé tyí: «Yé ye ñ yõ! Kù pɩ, té yé ñ yahle n vyāh? Tyi pèpey ye à pɩ ñmo tyí sě yò.

7 Nte, yāmtām ki me ànê yéle sōmesó. Yé ki fẽ pèpɔrɔle n pi pé tyí, kàh nɔ yé tyí gbí nêne. Nte, n̄mɔ tẽ wɔ náh n me n pi yéle sōmesó.

8 Pi mè pi pi tẽ ye à pi. A kwāh tẽ làsèkwèl mɔ n̄mɔ wil yõ. A kè tõ sah te diki sɔkɔ dahn̄mɔ yīnne.

9 Mé ki kè yo yé syah kègbɔ yõ ne, kèkõyó pól sɔkɔ, n̄v̄n̄n̄ wey sán-à n yo n̄yāh, pi mè-á nê pi, képah tɔ ki n yo. No dyɔ ki n kwne n̄ tyíle.»

Yudasi v̄inóle Yesu náh

10 Yudasi Yisikaryotile, Yesu *tò sáhpú nép̄i gbõnimí sɔkɔ yó ye sò n̄ne. N̄mɔ sɔkɔ à kyɔ yo *sárká w̄ilk̄ipu yõtām n̄gbnɔ tyí ne, páh ki fẽ Yesu dahbɔ pé gbõ.

11 Kàh pi s̄ẽ, n̄ wey mè nóhnó kah nɔ pé tyí. Pè me yo sah núkú yõ ne, páh ki pó dan yóle à kõ. Képah sɔkɔ, Yudasi-á pi s̄õ, té à dahbɔ n pi pé gbõ, à tyah képah sókó-ńsahle n yah n kõ.

Yesu pè kõ pè Paki yõke pi

12 S̄ẽ-n̄k̄ẽ búrn syáh tyah sóle, Yesu *tò sáhpú à piki yah ne, n̄yāh sɔkɔ se à me ké tyí ne, pé kyɔ *Paki yõke pi n̄ tyí nɔ? *Nsyifunɔ ńk̄ẽne Paki képyènne n ko lésõle, képah ye.

13 Képah sɔkɔ, à n̄ tò sáhpú nép̄i nímí wilki tõ, té yo pé tyí ne, pè kyɔ kwil sɔkɔ. Pàh ki de n te, p̄ah ki dí yó yohni, à ki me ni p̄ín twah. Pè n̄ sò tẽ.

14 Wàh kɪ kyɪ de gbô nê, pè yo kéne gbô nétĩ tyí ne, kwó-ò dí-á ne, wòkò nê sɔkɔ se pé kɪ pɔ n yõ n pi Pakɪ yõkele ànê pé tò sáhpúle nɪ?

15 Wǎh kɪ pè wěkɪ yínyõ wòkò sɔkɔ táh ògbě yóle. Yíyìn pól-á kɪ me tǔnsàhnóle ké sɔkɔ. Ké nénpó sɔkɔ-á pè kɪ Pakɪ yõke pi pé tyí.

16 Wǎh yo sě, ò tò sáhpú kyɪ kwil sɔkɔ, té pè òtyínɔ kyɪ tyi pól we, wǎh sò kè yo sǒ pé tyí. Pè me Pakɪ yõke pi nénpó sɔkɔ.

17 Képah sɔkɔ, níví-á pɔ nɔ, à pɔ de ànê ò tò sáhpú népĩ gbõnimíne.

18 Pǎh sò me yónó sɔkɔ gbí nêne, à yo pé tyí ne, kègbɪ yõ, pépi sɔkɔ ne yó-á kɪ pɔ n vi n pi péwɔ náh, nê-á me n yõ péle fí núkú.

19 N tò sáhpú-á képah noh, pé yah kwɔ kègbɪle. Pè tyah òne n piki yah núkú núkúle. Nýɔ n ne, péwɔ se nɪ, nýɔ n ne, péwɔ se nɪ?

20 A yo pé tyí: «Yépi népĩ gbõnimí sɔkɔ, nê-á me n di òmɔle tǔngbil núkú sɔkɔ, tǔ wɔ ye.

21 Kègbɪ yõ, *Névi Pi kɪ n ku n pi, sǒ-á sò *Liyel wey séběnó kè yo sah ò tyí sɔkɔ. Nte, tyípékè ògbě ye kéle ò gbàh dénmo-ò tyí! N dúbí-ńkě ye náhkɪ fónfó ò dúbínó yõ.»

Yesu yõke téyne

22 Képah sɔkɔ, yõke yõ gbíne, à búrn tɔkɔ, té wekɪ Liyel tyí, té kɪ kwɔkɪ dibi pè kǒ, té yo pé tyí: «Yé syi kéle, òmɔ wil ye.»

23 Képah náh, à me ðivě wɔ wɔ kwâh tokɔ ðivěne ké sɔkɔ, té weyne Liyel kɔ̃, té kéle n̄ *tò sáhpú kɔ̃ pé pól wɔ ké sɔkɔ,

24 té yo pé tyí: «Képahle, nímo tó ye, nê-á kɪ névye yégbékè kwɔɔ mo ànê Liyelle. Kè kɪ kwe tówú yinne.

25 Mé kéle n yo yé tyí kègbɪ yō: Mé náh tō ðivě wɔ n yah n pi. Mâh pópó ðivěne n wɔ tō ntō, ðivě sán yó ye *Liyel yõtōrí tyah sɔkɔ.»

Yesu ne, Pyeri-á kɪ n̄ vyāh kōlɪ pé tyí sɔkɔ

26 Képah náh, pè Liyel gbílkinó yì gbɪ. Páh gbɪ te, pè yuku Wólívyê sésân yōlɪ yō.

27 Páh kyɪ nénpó, à yo pé tyí: «Yé pól kɪ nímo yahle n pi. Sǒ-á *Liyel wey sébĕnó kè yo sah ne, yípĕnfĕ-á kɪ ko mo, té yípĕy pól-á kɪ to karkɪ gbòplɔle.»*

28 Képah náh, à tō yō sɔkɔ yo pé tyí: «Mâh pɔ yuku ní kúntenɔ náh gbí nêne, mé kɪ kyɪ yéle n sykɪ Kalile sɔkɔ.»

29 Képah tĕne, Pyeri me yo n̄ tyí ne, téló pól-à kɪ sǒ à yahle, péwɔ tĕ wɔ náh à yahle n pi.

30 Nte, Yesu me yo n̄ tyí ne, páh kéle n yo n̄ tyí kègbɪ yō, kwey lékâh mē sɔkɔ, sɛnpɛ-à kɪ pópó n gbo ke nínó, wáh kɪ me n̄ vyāh kōlɪ te ke tōnó ne, pé náh péwɔ pĩ.

31 Nte, Pyeri tō kè tō yo yíí n̄ tyí ne, kũ fyé-à sǒ, páh kɪ ku ñne. Pé náh n yo n yah n pi pólle ne, pé náh ñne n pne. Pé no téló pól tɔ yo sĕ.

* 14:27 14.27 - Yah n te Sakari 13.7 sɔkɔ.

Yesu nîrî pínóle Yesemani soko

³² Képah náh, pè soko tyah yó, nýãh-á pè n ye Yesemanine. Pãh yîni tẽ nénpó soko, à yo ò *tò sáhpú tyí ne, pè tẽ ásô, pé mó kyí Liyel ni pò.

³³ Wãh n soko, à Pyeri ànê Nsyaki, ànê Nsyô tẽ soko. Té légbíne, ò foko sò me fẽki, té tiki me à kah tẽ.

³⁴ Képah soko, à yo pé tyí: «Yèkwori me ní soko, kè sò nne n ko. Yépi tẽ ásô, té yé káh ne n do!»

³⁵ Té yuku yah òinne kwéy, à kyí gbètukunò di, té yo Liyel tyí ne, káh kú fẽ pi n pi, à pé wilki kwlónó mè soko.

³⁶ A tó yo pé kwil wey soko: «Aba, bõ, tyi pól me áwò gbò. Nmò wilki yèvyãhri mè soko. Nte, nê-á me ké soko, nímò dýò yí tẽ káh pi, té áwò tyí mó pi.»

³⁷ Wãh níri pi te, à ò syi pò tò sáhpú népí tòmí nópi tnô, à pò pè pè me n do. A yo Simo Pyeri tyí: «Á me n do kè? Á náh tẽ we yah kwéy kè no lér núkú ntẽne kè.

³⁸ Yé gbah tẽ yé ne n yah, yé mó Liyelle n ni, yé káh pò *sétò tónmòno fẽ syi. Foko sòno pèpèy me névi soko, té ké pínó tãhkì náh me ò soko.»

³⁹ Wãh yo te pé tyí sã, à yal pé tnô, té tó kyí níri pi gben tẽ tyí kòle.

⁴⁰ Képah náh, à ò syi pò ò tò sáhpú tnô ntò. A pò pè we, dýò me tẽ we pé tyí. Yo yo tir náh tó we pé tyí.

41 Wǎh tǒ kyɪ pɔ ke tǒ-òlɛ, à yo pé tyí: «Yé me sě tě yéle n mi kè? Kè tyɛ! Ké gbí no.

Núkúnúkú, *Névi Pi ki dahbi nɛpɛl gbò.

42 Yé yuku á sɔkɔ! Yé yah, névi nê-á nímɔlɛ n dahbi pé gbò, tě pɔ tɛ.»

Yesu tɛnóɛ

43 Wǎh mɛ képah yónó sɔkɔ sě, à náh tǒnì yo tɛ, té Yudasi, nê-á n *tò sáhpú nɛpí gbõnimí sɔkɔ yóɛ, ñmɔ yĩn méfwóbé nékwínkí yísyó yah, à pɔ kèkírɛn ànê léplóɛ pé gbǎn. *Sárká wílkɪpu yòtǎm ñgbnɔ ànê *Liyel ñgbò wěki kwópú ànê yèwǎhnì ye sò tɛki mɔ péɛ.

44 Tě nê-á sò Yesu dahbi n pi pé gbò, à sò mɛ pi dùkù yóɛ pè wěki sah. A nɛ, páh ki pɔ wɛki nê tyí té à pɔrɪ tě, ñmɔ-á. Pè à tě, pè mó ñnɛ n kyɔmɪ n yuku pallɛ.

45 Képah sɔkɔ, wǎh núkú pɔ yĩni tě Yesu tyí, à wɛki n tyí nɛ, pé kwó-ò dí, té núkú à pɔrɪ tě.

46 Kǎh pi sě, no nópi núkú pɔ tuke Yesu yó, à à tě.

47 Yesu tò sáhpú sɔkɔ yó núkú n kèkírki yɔrɪ dɛ, à sárká wílkɪpu yòtě ñgbě tǒnpi yó níki kǒ kǎm.

48 Képah sɔkɔ, Yesu mɛ yo pé tyí: «Yé pɔ nímɔ tě-ńsah kèkírɛn ànê léplóɛ yé gbǎn, á ki nɛ kèlékě névi sǒ ñnɛ.

49 Swǒ swǒ pólɛ, mé sò nkɛnɛ n nɛ n mɛ yé wró *Liyel wòkò ñgbě kéntáhkí sɔkɔ, névyɛɛ n kwɔ. Tě yé náh n tě. Ntɛ, tyi nóno-à yo *Liyel wɛy sébɛnó sɔkɔ, sépi píntũnɔ yĩn ye.»

50 Képah sɔkɔ, n tò sáhpú pól to karkɪ, té à sah.

51 Té kètɛnpíkɪ yó sò me Yesu sò tɛ, fwòpɪn núkú ó ye sò à pil. Pè à tɛ n fwòpɪn tyí,

52 à mó kè fe de mɔ, té to sɔkɔ n sɛnpũne.

Yesule Nsyifunɔ tukey tükèpu yah

53 Képah náh, pè Yesu tɛ yuku *sárká wɪlkɪpu yòtɛ ñgbɛ gbô. Ké nɛnpó sɔkɔ, sárká wɪlkɪpu yòtám ñgbɔ, ànê yèwàhnì, ànê *Liyel ñgbò wɛkì kwópú wɛ tuke mɔ.

54 Té Pyerɪ sò me Yesu sò tɛ wil fíí sɔkɔ, à pɔ we de sárká wɪlkɪpu yòtɛ ñgbɛ gbô, à kyɪ nyàhle n wne gbô táh sɔkɔ ànê yòtɛ dí tɔnpɪbɪle.

55 Sárká wɪlkɪpu yòtám ñgbɔ ànê *Nsyifunɔ tukey tükèpu pól sò me n yah n kɔ ne, pé tir yó we sah Yesu yò, pé à we ko mɔ. Nte, pè náh me vɪ-ñsah we ké tyí.

56 Tir yó náh, m̀nyobe tàrfyòné náhnáh sò me. Pé náhnáh sò me n wil m̀nɛne n yo n sah n yò. Té pépi n̄tɛ náh sò me sah wɛ tyí yò.

57 Túkù me n yuku lékàhle ñne n kɔ ne,

58 páh noh à me n yo ne, péwɔ-á kɪ *Liyel wòkò ñgbɛ mè sɔ, nê-á névi mɔ, té kɪ kè tɔ mɔ sɛpɪn tɔ̀nì wró, nê náh n pɪ n pi névi gbò m̀ɔnɛ.

59 Nte képah fyé yò, m̀nyobe tàrfyò nópi náh me sah tírr wɛ tyí yò.

60 Képah sɔkɔ, sárká wɪlkɪpu yòtɛ ñgbɛ yuku yɪn no pól yah, té Yesu piki yah ne, tir kó me n

tyí yo yo tēne ni, pãh me tyi nóno pólle n yo n sah n yõ?

⁶¹ Nte, Yesu náh vi mo n tyí, à náh tir yó yo n tyí. Sárká wĩkĩpu yõtē ñgbẽ tō n syi à piki yah ne, ñmo se *Kristale, Liyel-á ne, páh ki ne teki mo ni? Liyel, nê-á pé pól me n gbilki, n dórí pi se ñne ni?

⁶² Yesu me yo n tyí: «Àwe, ñmo ye. Té yé ki *Névi Pi we kōntēnóle tyi pól Tē Liyel gbõyò sòle, ki me n tiki n pi nyĩrn soko.»†

⁶³ Képah soko, sárká wĩkĩpu yõtē ñgbẽ foko kah vyãh. Fòkòvyãhnì tē tyí, à n fwòmɔn yoru to, té me n yo ne, pé se noh ni? Tàrfyò yah yah tē náh tō me ké soko.

⁶⁴ Pé kó Liyel tyí wékíndenɔ noh n tyí ni? Pé se ne, pé pi sō ñne ni? Névye pól yuku yo ne, wãh yĩne kònmɔnɔle.

⁶⁵ Pé tókù yuku n sɪn n mo n po n yõ. Pé n yah vike tũ, té ñne n mikì n po gběnkukurinóle. Té yo n tyí ne, à yo pé syah, nê-á mi ñne. A kè sãh n pĩ. Képah soko, tukey tükèpu tònpi bi Yesu tē n létáhlóle n kōli.

Pyeri ne, pé náh Yesu pĩ

⁶⁶ Képah soko, Pyeri sò me gbyêh sò, gbô táh soko. Té *sárká wĩkĩpu yõtē ñgbẽ tònpi pi yó po.

† **14:62** 14.62 - Nê-á Liyel tēntò syinyo-ò yo sah Daniyel 7.13 soko, Yesu ne, pé gblyò tyí-á pé n yo.

67 Wǎh Pyeri we à me nyàhle n wne, à à gbah yah, té yo òn tyí ne, òmò tó-á sò me Nasareti kwil Yesule!

68 Nte, Pyeri me òn vyǎh kǒli té ne, pé nǎh à pǐ, péwò ntě nǎh me òn wey mè syíkí-ńsah we dé. Wǎh yo sě, à wil kyí yǐn kélé yah.

69 Képah tǝne, pi mè-á tǝ kyí à we, nónó-á sò me nénpó, à tǝ képah núkú ó yo pé tyí ne, dí mènne, pépi sòkò ne yó-á!

70 Pyeri me tǝ òn vyǎh kǒli. Dǝ, névye nónó-á sò me nénpó, pépi tǝ tyah n yo Pyeri tyí ne, yékâb nǎh n me ké sòkò. Wǎh n wil Kalile sòkò, no nópi sòkò ne yó-á òn tǝle.

71 Képah sòkò, Pyeri tyah òn gblǝyne n wo pélpèl ne, dí nê tyí-á pè n yo pé tyí, pé nǎh ònne n pne gbógbó.

72 Nénpó swò, sénpe gbo ke ní-òle. Képah sòkò, Pyeri dyò to kò Yesu wey tyíle, wǎh sò nê yo òn tyí ne, sénpe-à kú pópó n gbo ke nínó, wǎh kú me òn vyǎh kǒli tǝ ke tǝnó ne, pé nǎh péwò pǐ. Képah tǝ sòkò, wǎh képah sò, à tyah n gbo.

15

Pè Yesu tǝ yuku Pilati tyí

1 Képah sòkò, séngbǝ púpúle, *sárká wǐlkǐpu yǝtǎm ògbnò, ànê *Liyel ògbò wǝkǐ kwópú, ànê yèwǎhnǝne, pépi pól ye sò pi *Nsyifunò tukey tükèpu yǝtǎmne. Pépi wǝ tuke mò Yesu tyí sòkò. Képah tǝne, pè à tǝ pukubi, té kyí ònne *Pilati gbǝ dahbi.

² Pilati me à piki yah ne, ñmɔ se Nsyifunɔ yõtɛne ni? A me yo ñ tyí: «Áwɔ ye yo kéle.»

³ Képah sɔkɔ, sárká wìkìpu yõtãm ñgbnɔ me lékàhle à kǒ tyi náhnáh sɔkɔ.

⁴ Képah náh, Pilati me tǒ à piki yah ne, à kó tir yó yo n pi ni? Tyi nóno pól-á n yo n sah ñ yǒ, à kó sè noh ni?

⁵ Nte, à náh tǒ vi mɔ. Képah Pilati yáh-ńsah tyɛ.

Pè Yesu gbàh de mɔ kǔ kǒ

⁶ Ye ye pólle, *Pakɔ syáh-à n syah, *Pilati ñkɛne wòkònpèkè sɔkɔ ne núkú yó fin mɔ, nê tyí-á nɔ tówù tyí.

⁷ Pãh Yesu tɛ kyɔ Pilati fɛnne gbí nɛne, dí yó sò me wòkònpèkè sɔkɔ, pè n ye Barabasile, ànê pé nolɛ. Pè sò nékókè mɔ gbí nê-á sò pè me yahle sàhnóle *Wromenɔ tyí yǒ.

⁸ Képah tɛne, tówù yuku kyɔ de Pilati fɛnne, à kyɔ tyah ñne n ni ne, wǎh dar, té tir nɛne n pi pé tyí Pakɔ syáhnó sɔkɔ, wǎh náh kè pi pé tyí.

⁹ Pilati mó yo pé tyí ne, pè se ne, pé *Nsyifunɔ yõtɛ ñgbɛ fin mɔ ni?

¹⁰ A sò kè pǐ ne ñkɛ, dyɔ yónó-á *sárká wìkìpu yõtãm ñgbnɔ kǒ pè Yesu dahbi péwɔ gbò.

¹¹ Té sárká wìkìpu yõtãm ñgbnɔ sò me gbah tɛ tówùle n kurki n mɔ ne, pè yo ne, à Barabasi wilki fin mɔ pé kǒ.

12 Pilati pè piki yah tǒ rítǒ nɛ, sǒ se pé kɪ pɪ dí mènɛ, nê-á pè n ye Nsyifunɔ yǒtǔnɛ nɪ?

13 Pè tǒ gbo mɔ, té mɛ yo: «Yé à syɪ *dahni yǒ!»

14 Pilati yo pé tyí nɛ, tyípékè nê se à pɪ nɪ? Pè tǒ tǒ gbo mɔ náhnáh ríkǔ, à syɪ dahni yǒ.

15 Képah sɔkɔ, Pilati Barabasi fin mɔ. A sǒ mɛ tówú nìvìlɛ n yah n kǒ, képah ye. A pè kǒ pè Yesu ko yèfǒhlɛ, té ònɛ sràhsyíbí kǒ nɛ, pè kyɪ à syɪ dahni yǒ.

Sràhsyíbí kǒlɛ Yesu ko

16 Képah tǔnɛ, sràhsyíbí Yesu tǔ yuku gbô niyó yǒtǔ dí tǔ-nìsah, té pé no pól ye tuke mɔ.

17 Pǎh kɪ pɪ sǒ, té kɪ kǒlɛ à wɛ n ko n pi, pè fwòmɔn syâh pèpɛy yó mɔ à kǒ té, yǒkǒ pɪ pǎn yìlɛ, à dyɪ à kǒ tǔrí yókúrí swɔ.

18 Té tyah n yo n tyí nɛ, páh n wɛkɪ n tyí, *Nsyifunɔ yǒtǔ nǔgbǔ,

19 té ònɛ n mɪkɪ n yǒ sɔkɔ gbè-ńsɪnnɛ, té n sɪn n mɔ n pɔ n yǒ. Pè gbètukunɔ di, à kɔ kwĩnki sétáh n yah sɔkɔ.

20 Pǎh kǒlɛ à ko tɛ, pè fwòmɔn syâh mè dɛ n wil. Té tǒ n flo tɔkɔ mɔ à kǒ. Képah náh, pè wil ònɛ kégbó sɔkɔ n syɪ yɪnnɛ *dahni yǒ.

Pè Yesu syɪ dahni yǒ

21 Sireni nɛ yó sǒ mɛ, pè n ye Simolɛ, Aleksǎdre ànê Wurfu súlɛ. Légbínnɛ, òmɔ sǒ mɛ wil swâh, mɛ pɔ n sɔkɔ. Sràhsyíbí à kyɪ mɔ, à Yesu syɪ syɪ *dahni mè twah.

22 Pè yuku Yesule tyah yó soko, nýāh-á pè n ye «Kolkotala», yògbèkè tyahle.

23 Té pè me syibi yó fēki mo divē soko à kō ne, à wɔ, té à yahle.

24 Képah náh, sràhsyíbi à syi dahní yō, té me ndan mo à n flo dibi wē tyí.

25 Páh à syi gbí nēne, gbí me pōntōki soko.

26 Páh à syi yō nē yō, pè kè wārki syi n yòtah sésár sénó yō ne: «*Nsyifunɔ yòtē ñgbē».

27 Té me tō kèlékē névye népí ními syi dahlo yō n gbòplo, n gbòyò ànê n gběyìnè sò. [

28 Képah soko, nê-á yo sah *Liyel wey sébēnó soko ne: «Pè à mo kō tyípèl pípú soko»*, kè ntyínɔ pi sē.]

29 Képah tēne, wēkɔbi sò me ñne n gbyɔ n soko, té me pé yòle n kal, me yo tū n tyí ne, ǒǒ, ñmo nê-á sò ne, páh ki *Liyel wòkò ñgbē so, té ki kè tō mo sèpìn tōnì wró,

30 à n gblɔy pwah n mo, à mó tiki dahní yō!

31 Képah núkú-ó ye, *sárká wìlkìpu yòtām ñgbno ànê *Liyel ñgbò wēkì kwópú sò me kóle ñne n ko, té me n yo wē tyí ne, wāh névye túkú pwah mo, té à náh fē n gblɔy pwah n mo!

32 Nmo-à ki ne Liyel-á ne, páh ki ne tekí mo Yisrayel yòtēne, à tiki dahní mè yō! Páh ki képah we, páh ki sē n yō. Té nónó-á sò me syínóle dahlo yō n gbòplóle, pépi to me ñne n gbyɔ.

* 15:28 15.28 - Képah sò yo Yesayi 53.12 soko.

Yesu kúnóle

³³ Gbìntǒ pǒle, lékâh mǒ sétáh pól yǒ sǒkǒ, fǒó à pǒ nǒ gbèkām gbí tyí.

³⁴ Gbèkām gbí-á nǒ, Yesu kah de syi, té yo pé kwil wey sǒkǒ: «Eloyi, Eloyi, lama sabaktani?» Képah n yo ne: «Nmǒ Liyel, nǒmǒ Liyel, kú pǐ, té á n fin mǒ?»

³⁵ Nónó-á sǒ me nénpó té kè noh, pé tókù sǒ me n yo ne, pé tǒkǒ noh, wǎh me *Yelile n ye.

³⁶ Képah sǒkǒ, pé sǒkǒ ne yó me to kyǐ sènsúkúrí tǒkǒ dahbǐ wilki yǒyǒkì ni sǒkǒ, à dyǐ gbey yó vyǎh tyí, à pǒ nǒ n tyí ne, à wǒ, té me yo tǔ ne, pé ye yah òkàh Yeli-á kǐ ntyíno pǒ à tiki mǒ n pǐ *dahnǐ mè yǒ nǐ?

³⁷ Képah nǎh, Yesu me de syi, té pyě ku.

³⁸ Nénpó swǒ, fwǒ nê-á *Liyel wǒkò òngbě fǒkǒ táh dibi nínó, kè tǒ, à tǒkǒ ké yǒtah, à pǒ syi sétáh tyí.

³⁹ Sràsyíbí lèkwě yǒtě dí nê-á sǒ me yíntténóle, té n ku dùkù we sě, à ne: «Gbǐ yǒ, dí mènne, Liyel pǐ ye ntyíno sǒ ònne.»

⁴⁰ Syó yísyó tǒ sǒ me yǐn tě fíí, me n yah. Pépǐ wró sǒkǒ Makadala kwil Mari, ànê Mari nê-á Nsyaku pǐr ànê Yose yúne, ànê Salome sǒ me.

⁴¹ Pépǐ ye sǒ Yesu sǒ tě, n tǒle n pǐ Kalile sǒkǒ. Syó kwǐnki yísyó tǒ sǒ yuku ònne Yerusalemǐ sǒkǒ.

Yesu yínóle diki sǒkǒ

42 Păh Yesu ko mo só nê nívíne, ké dèndal ye sò pi *Nsyifunɔ *mɪ mɪ yòhle.

43 Arimatɪ kwil ne yó sò me, pè n ye Yosefulɛ. Nmɔle, Nsyifunɔ tukey tükèpu sɔkɔ ne pèpɛy yó ye sò ñne. Nmɔ to sò me *Liyel tǒrí pónóle n syɪkɪ. Nmɔ ñ nɪ syāh, à kyɪ Yesu lékó ni *Pilati tyí ne, à ñne pé kɔ, pé kyɪ à yĩ.

44 Pilati-á noh ne, Yesu-á núkú ku te, kè ñ yáh-ńsah tyɛ. A sràsyíbí yòtǔ dí ye pɔ piki yah ne, ñ kúnó di se mo nɪ?

45 Wăh ké gbɪ noh te sràsyíbí yòtǔ dí tyí, à mó wěkìle Yosefu kɔ ne, à kyɪ Yesu lékó tɔkɔ.

46 Képah sɔkɔ, Yosefu kyɪ fwòpɪn dwe. A kyɪ Yesu lékó de *dahnɪ yǔ, té à plo fwòpɪn mɛ sɔkɔ, à dah mo diki sɔkɔ, nê-á tǔ tekɪ sɔkɔ, té dáh-ńgbě yó pil pɔ vike ké yah.

47 Légbíne, Makadala Mari ànê Yose yú Mari mó Yesu dahnmo-ńsah yah pɔkɔ mo sah.

16

Yesu yuku wil diki sɔkɔ

1 *Mɪ mɪ yòh-á sɔkɔ, Makadala Mari, ànê Nsyakɪ yú Mari, ànê Salome kyɪ làsèkwɛl dwe Yesu yǔ mo mo tǔne.

2 Dimasyi só séngbǔ púsó, gbí gbo gbíne, pè yuku diki yǔ.

3 Syó nópi me n yo wě tyí ne, nê se kɪ dáh-ńgbě mɛ yɪkɪ mo pé kɔ nɪ?

4 Té pǎh ne, pé yah, pè dáhkɪ mɛ we pílntonɔle diki yah sɔkɔ.

⁵ Pè de yuku diki soko, té kyɪ kètɛ̃npìkì yó wɛ, à mɛ fwòmònpíkí mɔ kɔ̃ tɛ̃ gbòyò sòlɛ. Tíkí pè kah tɛ̃.

⁶ Tɛ̃ kètɛ̃npìkì mɛ mɛ yo pé tyí: «Yé káh tíkí pɪ! Nasarɛti Yesu ye yé n yah n kɔ̃, nê-á pè syɪ *dahni yõ. A yuku wil diki soko. A náh mɛ ásô. Yé pɔ yah n sɛ̃-ńsahlɛ.

⁷ Yé kyɪ yo Pyɛɪ ànê pé no téló tyí ńkɛ̃, wăh mɛ péle n syɪkɪ Kalile soko, sɔ̃-á lésô à kè yo sah pé tyí.»

⁸ Syó nópi-á képah noh sɛ̃, pè wil diki, à to soko wil syahrɪ soko tíkí tɛ̃ tyí. Pè náh mɛ n yo n mɔ nɛ tyí, tíkí kàhntɛ̃nɔ tɛ̃ tyí.

Yesu n gblɔ̃yne Makadala Mari wɛ̃kɪ

[
⁹ Dimasyi sô séngbɔ̃ púsó, Yesu yuku wil diki soko. A n gblɔ̃yne Makadala Mari n̄gbò wɛ̃kɪ, wăh lésô *sétàn kwărninɔ yĩni wilki pi nê soko.

¹⁰ Makadala Mari kyɪ kè yo Yesu *tò sáhpú tyí. A kyɪ pé wɛ kũ yèkwɔɪ gbní soko.

¹¹ Păh noh, Mari n yo pé tyí nɛ: «Yesu mɛ n vile! Nmɔ ye à wɛ!», pè náh sɛ̃ n yõ.

Yesu n gblɔ̃yne n tò sáhpú nɛpî nímí wɛ̃kɪ

¹² Képah náh, Yesu *tò sáhpú nɛpî nímí sò mɛ kwílpir yó wɛ̃kì tɛ̃. Păh mɛ kéné wɛ̃kì yõ, Yesu n gblɔ̃yne pè wɛ̃kɪ òkù yóle.*

¹³ Pè pé syɪ kyɪ ké yah yo pé no téló tyí, té pépi to náh tɔ̃ sɛ̃ pé yõ.

* **16:12** 16.12 - Képah ye yo dal mɔ Luki 24.13-35 soko.

Yesu n̄ gbl̄ɔyne n̄ t̄ò sáhpú nép̄î gbõnúkú wēki

¹⁴ Sép̄i pól sókóntɛnɔ náh, Yesu n̄ gbl̄ɔyne n̄ *t̄ò sáhpú nép̄î gbõnúkú wēki pé yōke yō gb̄íne. A pé yahle n̄ yo pé níki sékélkè, ànê pé tir yō sē-ńkē yinne. Páh s̄õnp̄i yahle pé vi wépú yō sēnóle pé kúntɛnɔ náh.

¹⁵ Képah sokɔ, à yo pé tyí: «Yé kyi n̄v̄n̄i wey sánne n̄ yah n̄ yo n̄ k̄õ kèk̄oyó névyɛ pól tyí.

¹⁶ Névi nê-à sē ké yō té *wèlnwilk̄inó we, ñmɔ ki pwah. Té nê-à sē ńkēne ké yō, ñmɔ ki wũ ké sokɔ.

¹⁷ Té nónó-á sē ké yō, yé ki pé p̄i pé tyíp̄inó sokɔ: Pè ki *sét̄anne n̄ ȳini n̄ wilki névyɛ sokɔ ñmɔ ȳin yō, té ki welɔ snóle n̄ wɛki,

¹⁸ té ki f̄ē wahy t̄ē pé gb̄òle, té ki f̄ē kwâh pèkè wɔ, té kè náh tir yó p̄i n̄ pi pé sokɔ. Anê páh pé gb̄ân sah yámpú yō, pè ki de.»

¹⁹ T̄ē-ñgb̄ē Yesu-á yo te sē, à yō dokɔ sokɔ ȳinyō, à kyi k̄õ t̄ē Liyel gb̄òyò sò.

²⁰ Képah náh, t̄ò sáhpú me kyi tyah n̄v̄n̄i wey sánne n̄ yo n̄ k̄õ yw̄õ yw̄õ pól sokɔ. T̄ē-ñgb̄ē sò me péle n̄ yohn̄i mɔ kéné t̄ò sokɔ, me gb̄il tyile n̄ p̄i, tyi nónó-á n̄ wēki ne gb̄lɔ-á pé welɔle.]

Toussian, Southern
The New Testament in the Southern Toussian
language of Burkina Faso: toussian du sud: wĩn
nìvìnì tirlɛ New Testament
Nouveau Testament en toussian

copyright © 2013 Wycliffe Bible Translators, Inc. in cooperation with
ANTBA

Language: Southern Toussian (Toussian, Southern)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 11 Mar 2026 from source
files dated 9 Jul 2025

aaf2875e-90b5-5c14-b910-61579d3da2c7